



E.W. DKHAR

**KA
MARIANG KA KREN**

Acc No - 9839/8

Class No. 985.93.D.11.Mar

Author Dikhar. E. W

Title Ka Mariang ka hren

Borrower's | || Borrower's |

Acc. No. 9839/8

STATE CENTRAL LIBRARY
GOVERNMENT OF MEGHALAYA
S H I L L O N G

1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*


Help to keep this book fresh & clean

KA MARIANG KA KREN

Da

E. W. DUKIAR

(1999)
(1st Edition)



LA PYNMIH DA I MARIANG KA KREN

State C Trial Library

Dedicated to my loving teacher Mr I E Djenqdoh
Retired Headmaster of Nongwar Pre byterian I P
School, Nongwar

SHIKYNTIEN

Nga la im la san ha pneh ka Mariang. Niar eh ki dieng ki siej, ki ñiut ki ñier, ki syntiew ki skud, ki mrad ki mreng, ki sim ki doh, ki khñiang ki ksiah bad ki jyrmie ki jyrthang kiba don sawdong kiba ngim tip kyrteng. Para khyannah ngi ju iakren bad iathuh khana ba kita kita ki sim ki noh ha kata kata ka sohdieng; pynkhreh ban leit jura bad pyrkhun shangkhwah ne ban taiar ki thit-pnah thit-sohlwa ban leit riam. Lada dei pat ki kynja mrad khuk khak ngi leit shna trep ban leit ap miet da ki khnam ki suloi. Ngì ju ia ong ruh hangta hangta ki brai ki bam sohkhylung ne hangta hangta ki skei ki bam sohkyngem ne ki bam sohmylleng. Ngì tip ruh ba na ki dak ki shin hangta hangta ki thiah ki iar khlaw bad kloi lan ngi pynkhreh ki torch light ki suloi ban leit siat mynmiet. Ki kyrkhaw bad ki Kairiang ki smiej ki kyndit rot namar ngi lushia ia ki jaka thiah jaka dem jong ki mynmiet. Yn don sohdieng sohkhlaw kiba ki briew bad ki mrad ki bam kiba ngi ngim tip kyrteng bad ym don khñiang don ksiah kiba ka khmat jong ngi ka la iohi kiba ngim tip ki dei kiei.

Ngi la iöhsngew kumno u ngap u kynud bad ngi tip shano u lwai u rah um. Haba u ngap u boi ngi sngewthuh la u dei u ngap sympa ngap snem ne u ngap wad sympa; la u dei u ngap wad kiaw ne u ngap iip kiaw. Tang shu boi ki ñiangrngap ne ki dkai ngi pynjröng la ki ryndang bad pynshalak la ki khmat ban shem haei ki dem haei ki wah. Ngi ithuh lut ia ki kynja kyieng kynja dkhi baroh bad ngi tip kumno bad ha kano ka rukom ki shong ki sah, ki thaw iing ki thaw skum. Ngi ju iakmen ruh para khyannah ban peitkai kumno ki 'khiew seiñiong ki kem ki bah ia u wieh bad ha kano ka rukom ki ia kynhoi ki ia risa thik kumba phawar ki nongtyor haba ki la iöh doh. Kine kiei kiei ki pynphylla bad pynlyngngoh shi katdei eh ia ngi namar ngim kot ban ngam sha ki thwei maian jong ka jingim jong kine ki jingthaw.

Ka mariang kam dei tang ka matti pynwandur jong U Blei: ka dei ka kitab ba maian bad ba kyntang jong U: kaba plied ia ki lynnong syrtap jong ka tang ha ka dohnud kaba khuid bad ba beit. Ka buhrieh pat wat ia kiei kiei kiab rit eh na khmat jong ki leh mynleh bad ki sngew batip: ki khwan myntoi bad ki lalot; kiba dung kura ia ka synia bad sngi na lyngkdong.

Kine ki syrtap jingjylliew ki bret ia ngi barabor ha ki umdum ka lyngngoh. Mano mo ban iathuh balei ba ka ñiangkongnwieng ka pah ha khmat synrai ? Balei ki mawphud ki rit, ki eh bad ki pyllon ? Balei ki sim ki kiew na ri thor sha ri lum ha ka por tlang bad ki hiar noh pat tang shu kut ka pyrem ? Balei ki ñianglyngur bad ki dkhi ki ieh iing-ra la ki skum tang shu poi ka por tlang ? Balei ka Shapuloit ka kha khun kbeit ? Balei u 'batïambait u kdup la ki sla tang shu pyndei tiak ia u ? Balei ki sla phyllut ki khapbrip tang shu sep ka sngi bad balei ka diengsong ka iām tang shu poi ka por tlang (ong u nongtem duitara) ? Balei ka mattah ka kit kyndung la ka iing kat sha ba ka leit ? Balei u khushia u bun snam bad balei ka Kitbru ka ud shuwa ban iap briew ha shnong ha thaw ?

Ban ngam sha kine ki pyian ki kynian donkam ia ka jingpule ryngkat ka jingwad bñiah. Namar, katba nang ngam katta ka nang jylliew: katba nang wad katta ka nang iar bad katba nang pyrkhat katta ka nang klang. Dei hangne keiñ ba ngi shem ba ka mariang ka dei ka kitab jong ki jingmaian.

U Nongthoh lyngba kane ka kot u pyrshang ban

khyllie syrtap pa syrtap ia kita ki jingjylliew kiba ka mariang ka kdup ka piam: kiba long ka tynrai ka thymmei jong ka jingiaid ryntih jong kiei kiei baroh kiba don ha ka. U kyntu ia ki nongpule ba kin sngewthuh ba kano kano ka jingpynkhongpong ia ki aiñ jong ka, kan phalang bad kyrtoh lyndet pyrshah ia u bynriew bad ia ki jingthaw baroh kiba im bakhih hapoh jong ka. Ka mariang ka dawa na u briew uba long u jingthaw uba kortam ba un dem la ka khlieh bad shahshkor ia ki jingiam jingud jong ka: naba ma u u long ka daw:bah jong ki jingjynjar baroh kiba ka mariang ka bah ka kit ha ka met jong ka shuwa ba ka por kan dier.



Nongthoh

KI KHUNG

Ka Mariang ka kren	...	1
1. Ki Jingphylla jong ki jingphylla	..	4
2. Ka aiñ ba nyngkong	...	7
3. Ka aiñ ba-ar	...	12
4. Ka aiñ kaba lai	..	17
5. Ka aiñ kaba saw		23
6. Ki khlaw ki btap	..	26
7. Ka jingthung dieng	..	33
8. Ki dpei, ki pajwa bad kiwei	...	37
9. U briew bad ki sim ki doh	...	41
10. ĩada ia ki mrad ki mreng, ki sim ki doh		45
11. Ki sim ki doh bad ka mariang	...	48
12. Ki sim ki doh: ki paralok	...	61
13. Ki sim bad ki ksaiñ ki ksiah	...	66
14. Ka jinglong ki sim	...	70
15. Ki mrad bapar	...	75
16. Katno ka dor u dieng sohphan tymmen ?		80
17. Kaei ka pollution ?	...	84
18. Ki Tlongum bad ki Wahduid	...	92
U Sai pynwai	...	98

KA MARIANG KA KREN

Kaei ka Mariang bad aïu ngi sngewthuh da kaba ong, -
'*Ka Pyrthei ka Mariang?*' Ka Mariang ka kynthup ia ka pyrthei
ka mariang bad ei ei baroh katba don sawdong ha ka, ia ka
suiñbneng bad ka haw haw sha jrong, ia ka ramew bad ka
meiramew, ia ki duriaw bad ki jingjylliew jong ki, ia kiei kiei
baroh kiba iöhi bad ki bym iöhi ha sawkun pyrthei. Kine baroh
kyllum ki pynlong ia ka mariang kaba im bad kaba ai jingim,
ka kmie jong ki jingpynlong baroh.

Wat la kam kren da ki kyntien pynban ka long ka
nonghikai kaba plie pongshai ia ki khuñ jingkyshew jingtip
baroh kiba ka dohnud u briew ka thrang bad ka wad. Ka long
da shisha ka nongkynther nongplait ia ki syrdeng kah dum
jong ki khmat ka jingtip, ka nongshut pynphyrnai jong ki bor
jabieng u briew ban shemphang bad sngewthuh ia ki maian
jingphylla kiba rieh ha ka; ka nongsar pynkhuid jong ka dohnud
bad ka nongkysiew na lwer ka jingiohthiah thai ba ka jabieng
kan lah ban peiphang ia baroh ki phngiat kiba ka mariang da
lade hi ka la buhrieh ha thymmei ka jingpynlong. Da lei lei
horkit hordang ym lah ban phngian jubor ia ka mon lade ha
ka lynda ngi la shemphang bad sngewthuh shuwa ia ka mon
jong ka. Baroh ki jingpynpaw jong ka ki long shisha ka kitab
bakhuid ba la bsap kyrhai da ki jingjylliew bad ki jingmaian ;

kiba da ai shisha ia ki jinghikai ba kordor ha ka jingim jong u bynriew man ka sngi.

Hato phi la ju khmih thuh haduh katno ka mariang ka pyndeng pynkup ia ki Saw Samoi da ki khor ki khriam jingitynnad naduh dang step phymgap haduh ban da sep ka sngi? Khmih katno ka pynbud da ki jingkylla pa ki jingkylla ha ka jingjai jai bad jingitynnad ba ka khmat briew ryngkat bad ka jabieng ba snah ka jwat ban kem lut bad sngewthuh ia ki. Dei kane keiñ ka jinglong kaba la shoh ieit ia ka pyrkhat u briew ba un peiphang ba pleng ym don da kawei pat ka khyrdop sha ki parbah jingtip nador ka khyrdop kaba ka mariang ka plie rynhang. Hoooid, ym don kawei pat ka jingshisha nador ki jingshisha kiba ka mariang ka piam ka thum ha pneh jong ka. Namar ba u bynriew um kot ka pyrkhat, u dap tang ka lyngngoh lyngngaiñ haba u khmied la ki khmat sha kito kiba la kiew sha ki kliar lum bah ka jingim, katba ki riwstad pat ki dap tang ka lyngngoh lyngngaiñ ban phai la ki khmat wat tang sha kito kiei kiei kiba don ha syndah jong ki bad kiba ki iohi man ka sngi. Namar kata, ym dei ban klet ba ka jingphylla baroh ha ka pyrthei ka mariang dei ka jingpyniaid ryntih jong ka mariang ia kiei kiei baroh kiba don ha ka .

Ban bat skhem ia kane ka jingryntih kaba horkit kam dei ban thut, ka mariang ka don ki aiñ ki kanun kiba shai, kiba beit bad kiba suk ban sngewthuh lada ka dohnud u briew ka khuid bad ka jabieng ka shai. Kaba phylla ba ki aiñ jong ka Mariang kim ju adong satia hynrei ki shu pynskhem. Lada

jia pat ba u bynriew u kdiah jubor ia ki ym tang ba ki wanrah ka jingma bad jingmysaw; hynrei uta hi uba pynkheĩn, da lade un hap ban tian bishar, ban long nongbishar bad nongrai pynrem da lade ia lade. Dei namar kane ka daw ba shuwa ba ngin ktah kti ban pynkheĩn jubor ia ki aiñ jong ka, ngi dei ban khan bad puson thik pa thik balei ngim burom ia ki aiñ jong ka .Shuwa ba ngin pynnoh ia u sawar ka mon ba laitluit, ngi donkam ban sngewthuh ia ki kyntien ba jar jar ba ka kren bad pasiaw ha ngi. Ban sngewthuh ia kita ki kyntien ba jar jar ba ka kren donkam ia ka jingduriap ba sani bha ryngkat ka bishar bniah ia kiei kiei kiba don sawdong jong ka kiba khot ia ngi ban thew ban woh da ka tarajur jong ka jingshemphang hi. Ki rieiwestad ki iathuh ba ki kyntien jong ka mariang bad ki kyntien jong ka jingstad ki long kijuh bad kita kiba shahshkor bad sngewthuh ia ki kyntien jong ka, ki long shisha ki briew kiba stad bad ba shemphang.



LYNNONG I

KI JINGPHYLLA JONG KI JINGPHYLLA

Hadien ba ngi la ngam bad thyllan sohkhrai ha kaba ngi duriap bad pule minot ia ki hara jingstad bapher bapher, ïa ngin ïa leit kai pyngngad shipor sha pneh ka Mariang – sharud ki wahduid ba kmen bad ba tngen, sha ki thwei bad ki khriang ba jngum bad ba lat lat, sha ki lum ba pawang bad ki them ba kynjai, sha ki kshaid ba rymphum bad ki wahbah ba kyrhuh, shapoh ki khlaw ba jngum bad ki pubon ba ngiew, shalor ki mawlong mawteh bad sha trai ki riat ki ram; ban king ha ki 'erbatemon 'erbatesi jong ki jaka phlang ba jyrngam bad ba padun bad mad ia ki kjat sngi ba syaid; ban siang ha ki thapniang u ngap u lwai bad ban bam ia ki 'erpyngad ba shngiam ba ïai beh tymfang : khnang ba ngi lah ban sngewthuh bad khyllie syrtap ia baroh ki jingphylla kiba la bsap bad buhrieh ha pneh ka mariang.

Kat sha ba ka khmat ka phai la ker tawiar ia ngi da ki jingphylla jong ki jingphylla suda – ki dieng ki siej, ki khlaw ki btap, ki sim ki doh, ki khñiang ki ksiah, ki syntiew ki skud, ki phlang ki kynbat, ki jyrmie ki jyrthang, ki lum ki wah, ki wah duid bad ki umpohliaw bad bun kiwei kiwei ki jingthaw bad jingpynlong kiba ym lah ñiewtang kiba la bret ia ka pyrkhat sha ka lyngngoh lyngngaiñ. Da la ki khmat ngi ïohi kyndiang ia ki hali bad ki lyngkha ba seisoh, ki brisoh brikwai ba stem rong ksiar bad ki khlaw ba jngum kiba pyndap shoiñ ia ka dohnud. Da la ki shkor ngi ïohsngew kumno ka 'ersynrai ka

beh ka sieng, kumno ka sohlyngngem ka ud pangnud, kumno u risang u shoh-kyrdoh, kumno u kui u shad mastieh, kumno u dkhan u rkhe ha trai kdait bad kumno u keirang u kyrha u phawar. Hato kine kim pyndap shoiñ ia ki khulpi ka dohnud ban kmen bad shad kmen ha pneh ka Mariang !

Baroh kat kaba ka khmat u briew ka iohi bad ka shkor ka iohsngew ki long ki jingai sbun ka Mariang; kiba bsa ba aibuiñ, ba pynkmen ia ka dohnud jong u bad kiba ai jingshemphang ia u kumno ba un im synlar ha pneh jong ka. Ka mariang, namar kata, ka dei ka kmie jong ki jingpynlong baroh bad ka thymmei jong ka jingim hi. Lada u briew u angnud ba un iai long u trai bad u nongioh kynti jong kine baroh kiba don ha ka pyrthei ka mariang, shisyndon u dei ban ieit, ban burom bad ban ñiewkor ia ka kum ka kmie kaba pun kaba kha, kaba sei long rynieng ryniot bad kaba sumar sukher shilynter ia u.

Ka mariang kam dawa ei ei na u briew lada u sngewthuh ban burom bad ñiewkor ia ki aiñ jong ka. Ki aiñ jong ka ki don tang khyndiat tylli bad ki long kiba shai, ba beit bad ba suk ban sngewthuh. Kine ki khot ia ka jingshemphang bad jingtip thuh jong u. La katta ruh u bynriew um ñiewkor ia ki. U kuman bad um patiw ia ki jingkren ba jar jar jong ka namar ba ka khwan bad ka lalot, ki pynthame bad pynbyrie ia ki khmat jong ka jingshemphang jong u khlem da phohsniew satia ba kine ki jingleh kin lymban bad kyrtoh lyndet ia u hi shisien ka sngi. Hangta ha lyngwiar sohsat un babe dier por

bad un lympat khlieh lehnohei kum ki briew jong ka nongbah Babylon bad Harappa. Un shem pleng ba ki jingñiewbeñ bad jingleh bym salia jong u ia ki aiñ jong ka ki long pynban ki jingñiewbeñ bad jingleh bymsuitñiew ia la ka longryñieng hi. Namar kata, shuwa ba kata ka akher apot ka sngi kan jia, mynta kloï lan u la dei ban kyndit bynriew; lym kumta ka umksang jingbyñ suidñiew ka ap ia u sha lyndet. Ka por ka dang don lada u bynriew u kwah ban pynim ia lade bad ia la ka pateng. Shisyndon u dei ban kylla kaba mut bad weng noh ia ka jingkhwan bad jingbym suidñiew kiba ju synshar khelaiñ ia ka jingim jong u namar, lada kine ki dang synshar ia ka dohnud jong u; ka jingjot kan lynsher ha ka por ba um poi pyrkhath.

Mynta ka Mariang ka ud ka iam bad ka khroh jar jar ia u bynriew ba un keiñ noh ka khwan ka lalot jyndei. Ki khlaw ki la synlen, ki lum ki le madan, ki wah ki la lyngkien sak da ka bih, ki mrad ki mrenng bad ki sim ki doh ki la jan duh jait, ka lyer ka la jysieh da ki pui pui bih, ki um ki wah ki la sdang swai bad ki jaka ba seisoh ki la kylla dewksang. La u bynriew un shemphang ne em aiu ka mariang ka kren ha pyrshah ki khmat jong u, lym kumta ki jingphylla jong ki jingphylla kiba ka mariang ka pynpaw man ka sngi kin jah rngai noh bad baroh ki jingaisbun kiba ka theh sei kin rngai noh na khmat jong u.

LYNNONG - 2

KA AIÑ BA NYNGKONG

Ka Aiñ ba nyngkong ka Mariang ka iathuh ba baroh ki jingthaw ba im ba khih ha ka ki don ka jingidei iasnoh ba kyntang hapdeng jong ki. Namar kata, ym don jingthaw ha sla mariang uba lah ban im hi bad long hi khlem kiwei pat ki para jingthaw (living organism). Kane ka aiñ ka iathuh ba ha ka mariang ki don million ki jingthaw ba im ba khih bad ki bym khih bad kine baroh ki don ka jingidei iasnoh iwei bad iwei pat. Kaba mut ba ym don jingpynlong ha ka mariang u ba lah ban im ban san tang da lade khlem da donkam ia kiwei pat. Bunsien, ha ka jingbym pyrkhat u bynriew u iaid lait na kane ka jingshisha. Ka jingbym shemphang ka lyngngeit pynthame ia ngi ban pyrkhat ba ngi shu long hi kumne kumba ngi long. Haba kumta balei keiñ ngin pynsalia bad pynshitom kai ban pyrkhat na ka bynta kiwei pat ! Hynrei ka jingwad bniah kaba sani ka iathuh ia ngi ba u bynriew um lah ban im tang ma u hi khlem kiwei pat ki para jingthaw bad jingpynlong. Lada kane ka jingshem ka long kaba shisha, ngin buh ha kimat jong ngi ia kane ka jingkylli da kaba pynshong nia bin pa bin halor kata ka jingshisha - kaba kumno mo kata ka jingiasnoh bad ka jingia dei kita ki jingthaw bad jingpynlong bad ha kano ka rukom ki iarap ia u briew ? Ban ai ka jubab kaba shongnia, kane ka jingiaathuh khana

kan shad jingshai halor ka jingshisha jong katei ka aiñ kaba
ym bit satia ban pynbaji ia ka bad kata ka long kumne :-

La iathuh ba ha ki sngi jong u Borkuhaiñ Syiem, ka
nam bad ka burom jong ka Jaiñtiapur ka la suhsieng kylleng
namar ba u syiem u long uba sian, ba stad, ba riewspah bad
ba khelaiñ bor. Sawdong ka iing syiem u don ka kper kaba
heh bad ba itynnad haduh katta katta. Ki sim bun jait bun
rong na sawlyer ryngkat ki sur jingrwai babang bathiang ki
wan ban riehtngen ha ka. Da ka dohnud kaba kmen ki ia pah
ia kyrkait bad ki ia her na u dieng sha u dieng. Ki thapbalieh
bun jait bun rong ki her khwoit khwoit na u syntiew sha u
syntiew. Ki ñiangkongwieng bad ki ñiangkalia ki rwai ki kynud
ha la ki samoi samoi. Ki soh ki syntiew ki sei ki plung bad ki
pyndap da ka jingkmén bad jingiphuh iphieng. Ka wahduid
ba khuid khliir khliir ka tem duitara synia bad sngi bad ka
pyntngen ia ki jingthung jingtep baroh kiba don ha ka. La ong
ba kat uba iohi ia ka um lah khlem da iaroh kyndeh mynsiem.
Ka da long shisha shisha la kat ka bneng ha pyrthei.

Ha kawei ka sngi u Syiem u la wan iaidkai pyngngad
hagdeng ki 'persoh' persyntiew jong kane ka kper. U iohi ia
ka jingsei jingplung jong ki dieng ki siej, ki soh ki pai bad ki
syntiew ki skud hynrei ka dohnud jong u kam phngaiñ kam
kmen. Ka daw baroh ka long ba u iohi ia ki synrum synram,
ki sla iap bad ki dieng pyut ba lang lynnong lynnong ha trai ki
diengsoh diengpai. Ka khmat jong u kam sngewtynnad ban
dang iohi ia ki phlang ki kymbat, ki ñiut ki ñier bad ki sboh

ki sbur kiba dang don pateng pateng hangne hangtai. U kwah ba ka kper jong u kan long kaba khuid ba suba kaba ym dei shuh ban don kano kano ka jaboh jabaifñ ne ka synrum synram. Mar mar kumta hi u la phah khot ia u rangbah nongsumar kper bad hukum ia u ban pynkhuid bad weng ia ki sboh ki sbur baroh na ka kper. U Rangbah nongsumar kper u la pyrshang katno katno ban batai bad pynsngewthuh ia u syiem, pynban um patiw ei ei.

Da ka dohnud kaba sngewsih bad ba khia um banse ban kohnguh jubor ia ka hukum ki syiem. U tip shai ba kane ka hukum kan pyntroiñ thiaw ia ka kper namar ka long pyrshah ia ki aiñ ka Mariang hynrei la katta ruh u kan tiaw ha la mynsiem bad u pyndep ia ka hukum ki syiem.

Hadien shisnem u syiem u wan jngoh biang ia ka kper. Ha ka jinglyngngoh lyngngaiñ u lap ba kam long shuh kaba phuh ba plung kumba mynshuwa. Ki dieng ki siej bad ki syntiew ki skud ki la sdang ban snai ban tyrkhong. Ka pang stem bad ka iaptram ki la sdang ban ktah ia ki diengsoh diengpai. Ka khyndew kaba sboh ba sbur mynta ka la tyrkhong raw raw bad hateng hateng ka pdang ka orpait bad ka sop-pailen. Ki sim ki doh kiba ju long ki jingkmen jong ka kper mynta kim don shuh. Ki ñiangkrai bad ki thapbalieh kiba ju pyntngen ia ka dohnud baroh ki la jah rngai. Ka wahduid kaba ju kynud naduh dang step haduh ban da miet ka la kynjah bad ring swai. Kane ka kper kaba mynno mynno ka la long ka kper kaba dap da ka jingim, jingkmen bad

jingitynnad mynta ka kylla long ka kper kaba iap bad bym don jingkyrmen. Ka dohnud jong u Syiem ka pang bad mardor u phah khot ia u rangbah nongsumar kper ban tip ia ka daw jong kane baroh.

“Paiem kynrad, kane ka long ka daw jong ka jingpynkheĩ ia ki aiĩ ka mariang. Phi la ai ka hukum ban pynkhuid ia ki sboh ki sbur, ki synrum ki synram, ki phlang ki kynbat bad ki jyrmie ki jyrthang baroh na ka kper ba kan khuid kan itynnad khlem da pyrkhat ba kito ki sla kiba hap na ki dieng ki siej bad kito ki dieng pyut kiba don ha trai jong ki diengsoh diengpai ki long ka umbuiĩ kaba bsa ia ki. Kito pat ki ñiut ki ñier bad ki phlang ki kymbat ki long ki nongteh nongbat ia ka dewlor bad ki nonglum nongkynshew ia ka um kaba hap na u slap. U slap pat u long u nongpyntngen uba ai jingim ia ka khyndew ba ka lah ban sei ia ki dieng ki siej bad ki soh ki pai kyrhai. Khlem u slap ka khyndew kan tyrkhong kan lyngki bad ki jingthung jingtep kin ym lah ban san ban mer. Ka sboh ka sbur ka long ka jingbam kaba bsa bad aibuiĩ ia ki jingthung jingtep. Haba ki phlang ki kymbat kim don shuh ym don nongteh nongbat shuh ia ka dewlor bad haba ia ka dewlor la rong noh da u slap bad ka lyer, ka sah sa tang ka dew eh ka dewksang. Te ki diengsoh diengpai bad ki syntiew ki skud ki tyrkhong ki snai namar ki kymbat kiba bat ia ka um slap bad kynshew ia ka kim don shuh. Haba kine kim don shuh ka umslap ka snu tuid lehnohei. Kine keĩ ki daw Paiem balei ba ka kper jong phi ka kylla long kumne.

Shuh shuh nador nangta, haba ki ñiut ki ñier, ki sboh ki sbur bad ki dieng pyut diengiap kim don shuh ki khñiang ki ksiah, ki wieh bad ki puit ki duh jait. Haba kine ki duhjait ki sim ki doh ki duh bam bad ki her iap namar ba thngan. Paiem, ngim dei ban klet ba ka don ka jingidei kaba kyntang hapdeng jong ki jingthaw baroh bad ia kane ka jingshisha kaba ka mariang ka la pynpaw ym bit satia ban pynthut ia ka."

Kine ki kyntien jong u rangbah nongsumar kper ki la ngam jylliew ha ka dohnud u syiem. U babe ba u la ai ia ka hukum kaba long pyrshah ia ki aiñ ka mariang. Kumta kumta u weng noh la ka hukum bad kyntu ia u rangbah nongsumar kper ban leh kumba u ju leh mynshuwa. Şa shisien ka jingim ka wan pat ha ka kper bad ka pynkylla dur ia lade ha ka jingitynnad bad jingiphuh iphieng kumba ka la ju long mynshuwa.

Ka long, namarkata, kaba mynsaw bad ba ma ban pynbaji khongpong ia ki aiñ ka mariang. U Borkuhaiñ Syiem u long uba sian ba riwspah bad ba khelaiñ bor hynrei u duna pat ban sngewthuh bad shemphang. U pdiang ia la ka jingbakla bad u shah shkor ia ki jingbthah jingpyni jong u nongsumar kper.

LYNNONG 3

KA AİŃ BA-AR

Kane ka AİŃ ka kren shaphang ka jingġaid beıt ġaid ryntih ba phylla kaba don ha ka Mariang. Ka ġathuh shai ba ha ka Mariang ka don ka jingġadei hapteng jong ki jingpynlong kaba thut shen shisien ba ki aİŃ jong ka ki thut wat la barabor kim da paw madan. Kane ka jingġadei jong ki jingpynlong ka don ha la ki lyngwiar lyngwiar. Namar kata, ym bit satia ban pynthut ġa kane ka jingġaid ryntih kaba don ha ka. Wat ka jingpynthut kaba khyndiat eh ruh ka lah ban pynbaji khongpong ia ka jingġaid beıt ġaid ryntih baroh kawei. Ban kham sngewthuh shai kumno kane ka aİŃ ka trei kam, kane ka jingġathuhkhana kan plie syrtap jingshai ia ka phang –

La ong ba ha ki sngi jong U Ramsingh Syiem ka Hima Sohra, la don kawei ka jingġia kaba la pynkhynġiuh rem ia ki raiot dkhar. U khla, uba im ha kawei ka 'lawbah pajieh na ka shnong; u la wan man ka miet ban bam ia ki jingri jingdup haduh ba la lynġiar kliang u shnong u thaw. Bran bran ki la wan ban ġam ban ud ha u Syiem. U Ramsingh u khot ia ka dorbar ki Bakhraw ban ia pyrkhāt kumno yn leh halor kane ka apot. Ka Durbar da kawei ka jingmut ka la rai ba dei shisyndon ban pynġap ia une u khla. Ki tyrwa ka buskit kaba heh ia kino kino ki riwshlur kiba nud ban leit pynġap ia u.

la kane ka khubor la rah kylleng ka hima bad da ki phew ngut ki tyrwa ġa lade ban leit hiarthma pyrshah ia uta u

khla. Kine ki riewshlur ki pyniap naphang lin ia ki kynja khla baroh kiba don ha kata ka khlaw bad ha ki khlaw ba marjan. Da kaba kmen ki paidbah jong kata ka shnong ki ia kynhoi ki ia risa - "Ngi la lait, ngi la lait na ki tyrsim u khla." Phewse, kata ka jingkmien jingrisa jong ki ka neh tang shipor. Katba nang wan ki sngi ki snem ki pung bad ki pukri ki sdang ban snai ban rngad. Ka khyndew ka sdang ban tyrkhong bad ka rep ka riang ka swai ka snai irat. Ka nemsniew kaba jur ka wan shoh ha kata ka snem bad bun ki briew ki iap thngan. U Syiem Ramsing bad ki Bakhraw ki kulmar jingmut wit bad kloi lan ki lum ka durbar ban ia pyrkhath kumno yn leh bad kaei ka daw kaba la wanrah ia kane ka nemsniew.

Baroh ki nongshong durbar ki ia shaiqng ngaiñ bad kim nang shuh ban pyrkhath ba ka jaka kaba bsa bad pyndap khaw ia ka hima kan hap ha ka nemsniew. U Myntri Umdor uba maiañ ka jingshemphang halor ki aiñ ka mariang u la khan bad puson jylliew halor kiei kiei baroh kiba la jia bad u khlei ia kine ki kyntien. "Paiem ba donburom bad phi kiba Khraw ki trai muluk ki trai hima. Hadien ba nga la pynleit jingmut bha halor kane ka kam nga shem ba kane baroh ka dei ka jingtim u Khla." U Syiem bad baroh kiba ia don hangta kim lah khlem da sngewsammuth ia kane ka jingkmien jong u bad mar kumta hi u Syiem u buh kane ka jingkylli, "Phi ong kumta Myntri bad kumno keiñ phin pynshisha ia kane ? u khla u im jngai bah ha khiaw - jngai bah na ka shnong ka thaw - u don jingidei iasnoh aiñ keiñ bad kine ki lyngkha ki

risai, ki pung ki pukri haruh nong ?” “Paiem kynrad bad phi ka dorbar ki bakhraw,” phai ktien u Myntri Umdor, “haba u khla, u nongshun jong ki mrad um don shuh, ka la don ka jingroi parum pareh jong ki mrad ki mreng. Sa kiwei kiwei ki mrad de ynda ki iöhi ba ym don jingma jingsyier shuh ha kato ka khlaw ki wan borti lang hangta. Ki bam lut khoit ia ki phlang ki kynbat katba ki don haduh ba ka khyndew ka la syllen, sah sa tang ka dewksang. Haba u slap u hap ym don nongkjit nongpynlang shuh ia ka. Ka tuid lehnohei bad rong ia ka ‘dewlor baroh. Dei kane ka daw keiñ balei ki pung ki pukri um baroh ki rngat bad ba ki lyngkha ki risai ki tyrkhong ki ryngkhiang. Ka jingroi jong ki mrad palat ia u pud uba ka mariang ka lah ban bsa bad kyrshan ia ki ka pynthut ia ka jingiaid ryntih kaba ju don ha ka Mariang. Haba ka khyndew ka ia kylla ryngkhiang ba ka ‘dewlor kam don shuh ka bor jingkha jingsei jong ka Mariang ka duh noh. Ki pung ki pukri kiba iöh jingbsa um na kine ki khlaw kim iöh shuh bad suki ki tyrkhong ki rngad. Haba ki pung ki pukri ki tyrkhong ki rngat ki pynthor bad hali kim iöh um shuh. Dei kane ka daw keiñ balei ka nemsnew ka wan bad ka tram ka ban ha kane ka shnong.”

U Syiem bad ka dorbar mynta ki shemphang ia ka daw jong kane ka nemsnew bad mar kumta hi ki pynkylla noh ia ka rai jong ki, naba, wat la kane ka rai ka long kaba bha shisha hynrei ka pyniaid khongpong pat ia ki aiñ ka mariang ba ka jingiaid ryntih kaba ju don ka duh noh.

Kane ka jingjia ka kdew phiak ia kawei ka jingshisha kaba ym lah ban len. U Khla u bat ia ka jingiaid ryntih ha ka Mariang. Ki mrad ki mreng ha kane ka khlaw ki im ha ka jingtieng bad jingsyier lynter bad um ailad ba kin roi sha ba palat u pud ba ka Mariang ka lah ban kdup bad bsa ia ki. Da kumne keiñ ka ailad pat ia ki ñiut ki ñier bad ki phlang ki kynbat ba kin san kin roi bad kynshew ia ka um bad bat ia ka jingiaid ryntih hapdeng jong ki jingpynlong ha ka mariang.

Kane ka aiñ ka long kaba shisha ym tang ha ki sngi jong u Ramsing Syiem hynrei ka long mynta ruh. Ka khlam ka tram jong ki diengsoh diengkwei bad ki jingthung jingtep ka la ktah jur ha kiba bun ki bynta jong ka ri namar ba u bynriew u la leh torti bad pynkheñ ia ki aiñ ka Mariang. Katba ki khlaw ki nang duna bad ki diengbah diengsan ki nang kyllon, ka khyndew ka nang ringswai bad tyrkhong. Ki wahduid bad ki wahrit ki la nang tyrkhong bad ka jingkyrduh umbam umdih ka la nang jur. U slap ka lyer ki la nang duna bad ka jinglong ka suiñ bneng ka la nang kylla. Ki ksaiñ ki ksiah ki la nangroi namar ba ki sim ki doh ki la nang duna. Ka 'dewlor ryngkat bad ka sboh ka sbur ka la nang tuid namar ba ki dieng ki siej kiba bat ia ka kim don shuh. Ki jingpang har rukom ki boi ki kynrup namar ka lyer ka la jy llei da ki 'ertngit bad 'erbiñ kiba mih na ki kor ki bor bad ki karkhana. Ki wahbah bad ki wahrit kiba ju dap da ki dohkha bad ki sher syngkai bamon kim don shuh namar ki la lyngkien sak da ki dawai bih bym lah ñiewtang. Ki mrad ki mreng ki la sdang duh jait ym tang

namar ba u bynriew u lushia ia ki jaka shong jaka sah jong ki hynrei u siat bad pyniāp pathar khlem don jingisynei. Lymda u bynriew u kyndit bynriew kloī ym tang ba ka nemsniw kan kynrup ia ka pyrthei ryngkat ki jingpang kiba ka saian hi kam shemphang; hynrei ka lah ruh ban pynkut noh ia ka jingim jong u na kane ka sla mariang.

Ka la dei ka por ba u bynriew u dei ban sngewthuh ba kano kano ka jingpynbaji ia ki aiñ ka Mariang ka long ka jingmysaw ia u hi bad ia ka pateng ka ban wan. U bynriew um lah ban im ha kane ka pyrthei tang ma u hi. U long ka bynta jong ka Mariang. Lada u kwah ba un don ka jaka ba kyrpang ba un shong un sah bad ban im ha ka jingsuk bad jingkmēn jong ka jingdap biang ha ka mariang, kiwei pat ki jingthaw ruh ki donkam kumjuh ia ka jaka ba kyrpang ba kin shong kin sah bad ba kin im ha ka jingkmēn bad jingdap biang jong ka mariang. U bynriew un dang iai im ha kane ka mariang katba u dang sngewthuh bad ailad ia kiwei pat ki para jingthaw ban ia im lang ha ka. Ka pyrthei mariang ka dei ka kmie bad ka kpait jingim jong ki jingpynlong baroh. Ka kwah ba u bynriew un im ha ka da ka jingsuk bad jingkmēn ryngkat ki mrad ki mreng, ki sim ki doh, ki khñiang ki ksiah bad ki dohkha ki dohpnat. Lada ka por kan poi ba u bynriew un duh noh ia kane ka bor shemphang, un duh noh ruh ia la ka jingim ryngkat ki jingai sbun kyrthai kiba ka mariang ka la pynkhreh ban theh sei halor jong u.

LYNNONG - 4

Ka Añ Kaba Lai

Ka Añ ka balai ka ïathuh ba ha ka mariang ka don ka jingiasnoh kawei jong ki jingpynlong (unity of living organisms) baroh kiba don ha ka. Ki stad saian jong ka Mariang ki ïathuh ba don ym duna ia ki 3 million jait ki jingpynlong ba im bakhiih kiba don ha ka. La ki ïapher eh ha ka dur, ka jinglong bad ka rukom im pynban ki ia don ia ka jinglong kawei. Kane ka mut ba baroh kine ki jingpynlong ki don kajuh ka shini (sugar), kajuh ka bor ter (Protein) bad kajuh ka atiar pynroi pynman (genetic material). Namar ba ki ia don ia kajuh ka jinglong. Kano kano ka kynja met kaba kine ki jingpynlong ki pynmih la pyndonkam da kawei pat napdeng jong ki. Dei namar kata ka daw ba ngim lap satia ba don kano kano ka kynja met ha ka pyrthei ka Mariang kaba ym lah ban pyndonkam da kiwei pat ki para jingpynlong kiba don ha ka Mariang. Kane ka añ ka ai kawei ka jinghikai kaba long kum ka jingmaham ba horkit hordang u bynriew um bit satia ban pynlang ha ka Mariang ia kano kano ka kynja met kaba long nongwei ha ka.

Ka bor tipthuh ka ïathuh ba sawdong jongngi ki don million ki jingpynlong ba im kum ki dieng ki siej, ki phlang ki kynbat, ki ñiut ki ñier, ki kynja tit bad ñiutmaw, ki mrad ki mreng, ki sim ki doh, ki khñiang ki puit, ki ksaiñ ki ksiah bad kiwei kiwei ki jingpynlong kiba ngi lah ban ïohi bad kiba ngim

lah ban iohi da ki khmat. Ki riewstad jong ka juk mynta ki iathuh ba ki la lah ban jer kyrteng haduh 30 lakh jait bad baroh ki don ia kajuh ka jinglong – kajuh ka shini, kajuh ka bor tei bad kajuh ka atiar pynroi pynman. Namar kata, kano kano kaba kitei ki jingpynlong ki pynmih lah ban pyndonkam da kiwei pat ki ba kum ma ki hi.

Kane ka long ka jingpynbeit ryntih jong ka Mariang. Ha ri jong ngi ki don bun jait ki ñiut ki ñier ha ki khlaw ki btap, ki soh ki pai bad ki syntiew ki skud bun jaid bun rong. Da la ki khmat ngi iohi ba ki sim ki doh bad ki mrad ki mreng ki puh ki bam ia kine ki soh bad da ki hajar jait ki khñiang ki ksiah, ki thabalieh bad ki ngap ki lwai ki boi ki kyt ia ki um jong ki. U briew bad u mrad ruh ki sngewtynnad ban bam ia ki soh ki pai kiba ki diengsoh diengpai ki sei ki pynmih. Ha kane ka rukom uwei u jingpynlong jong ka Mariang u iarap ia uwei pat bad ki im pahuh pahai ha ka jingkmen bad jingdap biang.

Ynda ki dieng ki siej pat ki iap ki pyut ngi shem ba ki kruiñ, ki dkhiew, ki tit, ki ksiah, ki ksaiñ bad ki wieh ki bsa ia lade da ka met pyut jong ki. Kumjuh ruh haba u masi u iap, ki khlieng, ki tyngab, ki pukni ki puh ia ka doh jong u. Ia ka saphret saphrong kaba sah pat ia bam da ki skaiñ, ki ksaiñ, ki dkhiew, ki wieh, ki khñiang, ki ñiut ki ñier bad ki dieng ki siej. Ha ka met jong u dieng ne u masi ki don bun bah ki kynja met bin bin(chemicals) bad ia kine pat la pharia bin da kiwei pat ki kynja met ba ngi khot micro-organisms kiba don ha ka khyndew bad pynkylla ia ki sha ki kynja mluh bad

kynja met khyndew (minerals) kiba pynphai pat ia ki sha ka dewmet. Kane ka dei ka jingiaid lynti jong ki jingthaw bad jingpynlong baroh kiba ka Mariang hi ka la buh ryntih. Kane ka pynskhem ia ka jingong - na ka dewmet ngi wan sha ka dewmet ngi leit phai.

Hynrei ka mat kaba ngi dei ban sngewthuh ba kane ka aiñ ka kren ka long horkit hordang ym bit satia ia u briew ban pynlang ha ka mariang ia kano kano kawei pat ka kynja met kaba long nongwei ha ka; kaba ki jingpynlong baroh ha ka Mariang kim lah satia ban pdiang bad pyndonkam ia ka. Kane ka jingong lehse kan pynkyndit bad pynlyngngoh ia kiba bun bad khlem artatien kin buh ia kane ka jingkylli - hato don mo kaba kum kata ka jingpynlang kaba u bynriew u bret ha ka Mariang? Ka jubab ka long – ho-oid bad kane ka long kaba mynsaw haduh katta katta khamtam lei lei naduh ba u bynriew u la roi sted ha ka saian bad technology. Da ki bun hajar jait ki met nongwei u bynriew u la bet ha ka mariang haduh ba ki riwpyrkhat jong ka juk mynta ki la lynñiar kliang: ka lyer ka la lyngkien da ka 'erjakhlia bad 'erbiñ kaba mih na ki kor ki bor bad ki karkhana. Ka Ozone kaba iada ia ka pyrthei ka Mariang na ki kjat sngi ultra-violet kiba pynmysaw ia ki jingpynlong baroh ha ka Mariang ka la jysieh sak da ki jaboh jabaiñ bad ki jakhlia jakhlait kiba ki phewhajar tylli ki kor ki bor bad ki karkhana ki pynmih man ka minit bad kine ki byrngem ia ka jingim jong ki jingpynlong baroh kiba don ha ka pyrthei ka Mariang. Dei namar kane ka daw ba ki jingpang

kynsha ba harukom ki kynrup ia u bynriew kiba ka medical science hi ka dumbuit jlang.

Ha ka snem 1942 ia ka pyrthei la byrngem da ka khieshohrih (malaria). Ki riwestad ki pynsabut ba dei ki 'kaiñ pyrjong kiba wanrah bad pynroi ia kane ka jingpang. Ha ka jingstad jong ki la lap ia ka dawai DDT ban ñaleh ban pynduh jait ia kine ki 'kaiñ pyrjong. Kane ka DDT ka long ka met nongwei ha ka Mariang bad ki khlieh sorkar baroh jong ka pyrthei ki rai ba dei ban synreit DDT ha ka pyrthei baroh kawei ban ñaleh thma ia ki 'kaiñ pyrjong. Ki 'kaiñ pyrjong ki ñap bad ki duh jait shipor. Ki pung, ki nan, ki pukri, ki bir, ki nalla, ki jaka shong ahor, ki wahbah bad ki wahrit pat ki dap da ka DDT suda. Ki 30 lakh tylli ki jingpynlong ha ka pyrthei ka Mariang pat kim pdiang satia ia ka bad ka shu sah bad lang kumto. Haba ki kjat sngi ki shad halor kine ki um ki pynmih ia ka jynhaw um kaba snoh lang ha ka bad ka DDT. Kine ki jynhaw um pat ki hap ha ka dur u slap. Ka umslap ym tang ba ka tuid sha ki wah bad ki duriaw hynrei ka ngam ruh sha ka ramew da ka jingkjit bad jingtan jong ki phlang ki kynbat, ki dieng ki siej bad ki jhur ki jhep. Da kane ka DDT ka ñoh ban rung sha ka met ki briew bad ki mrad ki mreng kiba bam ia kine ki soh ki pai bad ki jhur ki jhep. Ka DDT ka ñoh ban rung haduh ka umbuiñ jong ka kmie kaba ai buiñ ia la i khun namar ba ka bam ia kine ki jhur ki jhep bad ki soh ki pai.

Hato kane kam long ka dor kaba rem kaba u bynriew u

hap ban siew namar ba u pynkheif ia ki aif ka Mariang? Hynrei ngim dei pat ban klet ba ym dei tang ka bih DDT kaba rung hapoh ki dkhoh met u briew. Baroh ki kynja bih bad ki 'erbi kiba ka saian bad ka technology ki pynmih ki rung bad kynton hapoh ka met u briew namar ba ki long ki met nongwei ha ka mariang. Khyndiat ngi shu lait mynsiem ba ka DDT bad ki lyer jakhla kiba mih na ki atoskhana jong ki karkhana bad ki tdem kali kim da long eh ki bih kiba khlai bor haduh katta bad kiba pyniap kumne kumne, ki shu bampong bad pyniap suki ia u.

Lada ngim pyndonkam da ka DDT bad kiwei pat ki 'erbi ban ialeh thma pyrshah ia ki 'kai pyrjong, hato don da kawei pat ka lad kaba kham bha bad ka bym pynmynsaw? Kynmaw ba ka nongshun kaba khlawtam jong u bynriew dei ka jingbym iaishah bad ka jingkwah klo noh kumne kumne ia kiei kiei baroh. Halor kane ka jingshisha ka Mariang ka don la ka jubab ban ai kaba long khambha ban ia ki lynti stad baroh jong u bynriew. Ha ka aif jingpyniad ryntih jong ka Mariang kawei pa kawei ka jingpynlong ka don la u nongshun bad shisyndon dei ban lap ia uta u nongshun. Ka bor tipthuh ka iathuh ba ki nongshun jong ki khnai ka dei ka miaw, ka dkhoh, u kbeit, ki lymbit, ki sim, ki dkhiew, u briew bad kiwei. Ia kum kane ka aliar ialeh pyrshah ki khot ia ka biological control ne ka thma markynti para jingthaw.

La iathuh ia ngi ba u DDT u khlai bad donbor haduh katta katta ha ka snem 1942 katba mynta pat um donbor

shuh. Phi tip ka daw baler? Ki riewstad ki lap ba kito ki 'kaif
 pyrjong kiba lait iap na u DDT ki ioh ia kawei pat ka jingkylla
 kaba pher ha ka met jong ki: ka bor ban ieng pyrshah ia ka
 bih DDT. Kane ka bor ka mih ka kyrsoi hi na ka met jong ki.
 Namar kata, u dei ban shem da kawei pat ka bih kaba kham
 khlaiñ ban ia u DDT. Kane ka pynlong ia ki stad saian ban
 pynmih ki jait pa ki jait bih kiba kham khlaiñ bad kham
 mynsaw. La ong ba ha kane ka jingmareh thong ban wad bih
 thymmai ki riewstad ki pynmih haduh 14,000 jait ki bih
 shisnem shisnem bad kine ki bih ki rung ha ki jingthaw bad
 jingpynlong baroh kiba don ha ka pyrthei ka mariang. Kane
 ka long ka dor kaba ki jingthaw bad ki jingpynlong ha ka
 mariang ki hap ban siew Ban pynim ia lade bad ia ki jingthaw
 jingpynlong baroh ha ka pyrthei ka mariang u bynriew u la dei
 ban shahshkor aiu ka Mariang ka kren. Shisyndon u la dei
 ban shemphang ba ka Mariang kam sngewtynnad ia ki kynja
 met nongwei ban pynlang ha ka. Lada u kwah ban ialeh
 pyrshah ia ki nongshun jong u, ka jingshemphang kan hikai
 ia u ba un wad ia u nongshun jong uta u nongshun jong u. Ka
 thma markynti jong ki jingthaw bad jingpynlong ka long ka
 jubab babha tam lada u kwah da shisha ban imsuk imsaiñ
 kyrhai ha ka Mariang.



LYNNONG - 5

Ka Aifñ kaba Saw

Ka Aifñ kaba saw ka iathuh ba ka bor-sei bor-pynmih jong ka Mariang ka don ka jingsdang bad ka jingkut. Ka long kaba shisha ba baroh ki jingpynlong ba im bakhiñ ka mariang ki don ka bor ban kha bad pynmih syriem kum ka tyngka trai kaba pynkha sut. Lah ban pyndonkam ia ka sut hynrei ym bit pat ban ktah kti ia ka trai. Wei la ktah kti ia ka trai kan pyndkoh ia ka bor-sei bor-pynmih baroh: ka daw ka long namar ba ka jingiaid ryntih kala khongpong. Kane ka jingiaihuh khana kan nang pynshai shuh shuh ia ka phang.

U Sian u lap ba na kiba bun ki syiar kawei na ki ka kha pylleng ksiar man ka sngi Kane kala pynkmen bha bad pynim suk pynim saifñ ia u. Hynrei kynsan kynsan ka wan ka jinglalot kangar ha u. U kwah ban ioh shisynioh ia ki pylleng ksiar na ka kpoh jong ka khnang ba un riewspah shisien riewspah buk. Hynrei ynda u la puid ia ka kpoh jong ka ha ka jinglyngngoh u lap ba ym don pylleng ksiar ei ei.

Kaer keifñ ka jinghikai ba ngi ioh na kane ka jingiaihuh khana? Kumta ruh ka long bad ka spah jong ka Mariang. Ka ai ha ngi ia ki jingdonkam baroh katkum ka bor jong ka. Ngilah ban pyndonkam ia ki jingmyntoi baroh kiba ka ai hynrei ngim dei pat ban ktah kti jubor ia ka bad pynkheifñ ia ki aifñ

jong ka. Ka jinglalot bad jingkwah rhah palat ia ka bor ba ka lah ban sei ban pynmih ka pynthut bad pynkulmar ia ka jingiaid ryntih baroh kawei ha ka Mariang.

Ban nang pynskhem shuh shuh ia kane ka jingshisha, kane ka nuksa harum kan kham pynshai bniah :-

U Skhembor u don 100,000 tylli ki dohkha ha ka pung. Tang hadien khyndiat bnai ki la roi sha ka 150,000 tylli. U pyndonkam tang ia kita ki 50,000 tylli khlem ktah kti ia ki 100,000 tylli kumba la bthah u kpa. Hynrei hadien ba u kpa um don shuh ka jinglalot ka rung hapoh jong u. U kwah ban ioh spah noh kumne kumne. Ha ka jaka ba un pyndonkam tang ia kiba kharoi u ktah noh ia katei ka 100,000 tylli. Ka pung jong u suki suki ka nang duna bad ha kaba khatduh kamdon dohkha shuh. U babe dier por ba um shym pynshah shkor ia ki jingbthah jingpyni u kpa. U pynkheñ ia ka aiñ jong ka Mariang bad ka Mariang ka ai la ka jubab.

Kine ki 100,000 tylli ki long syriem kum ka fixed deposit ha bank bad ki 50,000 tylli pat ki long kum ka sut kaba pynkha man ka snem na katei ka trai. Katba ngim pat lushia ia ka trai ngi ioh bam ia ka sut. Kane ka dei ka aiñ jong ka Bank bad ka long ha kajuha rukom bad ka aiñ ka Mariang. Ngi lah ban pyndonkam ia baroh ki mar kiba ka mariang ka ai khlem da lushia bad pynkheñ ia ki aiñ jong ka.

Ka dohnud jong ka Mariang ka pait ka pra haba ka iohi ba u bynriew u dap da ka jinglalot kangar khlem pyrkhath. Ki

wahbah ki wahrit bad ki pung ki dap da ka shun, u tutia bad ki jingbthei dynamite ba sngewngiew haduh ba ki lun ki tham bad ki ñiangmaw ki iap duh iap dam. U bynriew u kylla long 'lenpula ba khlem dohnud, u nongshun jong ki jingpynlong baroh uba lute ia ka Mariang khlem jingisynei. Lada um kylla na kane ka jinglong khlem pep ka Mariang hi kan ieng nongshun ia u bad kita ki dak ki shin kila sdang paw tyngkreiñ ha pyrshah ki khmat jong ngi hi.

Kane ka aiñ kaba saw ka kren kumjuh ha ka jingiader u briew bad ki khlaw ki btap. Ka Mariang ka ai kyrhai ki dieng ki siej bad ki ñiut ki phlang ba u bynriew un pyndonkam. U bynriew u dei ban pyndonkam ia ki da ka jingshemphang. U dei ban tip kano ka dieng kaba u dei ban pom ban pyngngat kano kaba u dei ban iehnoh. U tymnen hyndai um ju leh pathar. Wat la u shyrti lyngkha u pynsah pat hateng hateng ki dieng-bet kiba ym tang kin iärap bet symbai biang hynrei ki ban bat ban teh ruh ia ka dewlor ba kan ym tuid lehnohei ha ka por slap. Nalor nangta ki ju sumar bad pynroi ia ki diengbha khlem da ailad ba kano kano ka jaka kan sah thylli sah khali. Ki la don bun bah ki briew ha ka ri jongngi kiba latei iing paki dulan bad kiba la kynshew spah la biang da kaba lute khlem jingisynei ia ki khlaw ki btap. Hynrei nga ong ba ka pateng ka ban wan khlem pep kan tim ia ki ha jingtep namar ba ki la long ki riewrunar ba khlem dohnud.

Kum ka jaitbynriew ngi la dei shisyndon ban kyndit bynriew shuwa ba ka por kan dier. Ng ieng ha tmier jong ka

jingma. Ki lum ki wah ki la syllen, ki khlaw ki la thylli kila lyngkhuid khlem don ba patiw ban thung bujli. Irat ngi la nangjam sha ka pynjot lade. Lada u bynriew um sngewthuh ba ka bor sei bor pynmih jong ka Mariang ka don ka jingkut; shisien ka sngi un thap ia la ka shyllangmat da ka jingbabe bad kata kan nym pynmyntoi ei ei ruh em ia u.



LYNNONG - 6

Ki khlaw ki btap

[Ia ka Ri jongngi la pyndeng pynkup da ki khlaw kiba rben ha kiba don kynhai ki dieng ki siej kiba ngim lah ban ñiewtang] Ki riewstad ki shem ba ñiar eh ban don ka Ri ha ka pyrthei kaba kham riewspah ha kane ka liang khamtam eh ki phlang ki kynbat. Kine ki dei ki spah ba kyrpang ba ka Mariang kala ai kiba ngi dei ban sngewnguh shisha shisha. Hynrei ngim dei pat ban klet ba wat la katne ngi don kim pat biang satia lada ngi da angnud bad khmih lynti shisha ba ka lawei jong ka jaitbynriew kan nang kiew bad nangphyrnai.

Kane ka jingkren lehse kan pynlyngngoh bad pynsngewphylla ia kiba bun balei mo ba ka dei ban long

kumta! Kine ki khlaw ki btap, ki dieng ki siej, ki ñiut, ki phlang ki kynbat ki donkam aïu bad ki don kaei ka jingïadei bad u briew ? Katno ngut na ngi kiba ju ïaidkai pyngngad hapoh ki khlaw barben bad ba kynjah bad aïu ngi shem hangta ? Khlem artatien ngin ong ba hapoh jong ka khlaw ngi ïohi ia ki diengbah ki diengsan, ki skong ki siej ki shken bun rukom, ki ñiut ki ñier, ki phlang ki kynbat, ki jyrmie ki jyrthang, ki syntiew ki skud bad ki soh ki pai kiba ki dieng ki sei ki pynmih, ki sim ki doh bun jait bunrong, ki mrad ki mreng, ki ksaiñ ki ksiah, ki khñiang ki puit bad ki laiphew jait jingthaw kiba ka Mariang ka kdup ka bsa ia ki. Hynrei nalar kine baroh kiba ka khmat jong ngi ka ïohi bad ka shkor ka ïohsngew kaei ka jinghikai ba ngi ïoh na ka ? Hapoh jong ka khlaw ka don ka jingkynjah, ka jingjai-jai bad ka jingpalei kiba pynkmen bad pyntngen ia ka dohnud u briew. Hato ngi ju pyrkhat pat balei ka leit long kumta? Ka daw ka long namar ba kata ka jingkynjah, ka jingjar-jar bad jingpalei ki phalang bad pynïoh ia kata ka jinglong hapoh jong ngi.

Hapoh jong ka khlaw barabor ngi shem ia ka jingtngen bad jingpyngngad katba shabar ka don ka jingkhluit bad jingshit kyrang jong ka sngi. Ha ka por miet pat ngi lap ba hapoh khlaw ka syaid bad pyngngad katba shabar ka khriat bad daitthah. Ka daw jong kane ka long ba ka khlaw ka pynïaid beit pynïaid ryntih ia ka jingshit jingkhriat ha ka Mariang. Namar kata, khlem tyngkai ngi lah ban ong ba ki khlaw ki btap ki long kiba donkam haduh katta katta ia u

briew. Ki long ym tang ki lok bad ki nongkyrshan jong u hynrei ki nongri nongsumar jong u kumjuh.

Phi ju peitkai ia uno uno u diengbah uba kyan bad pyiar ki tnad ryngkat ki hajar bad ki phewhajar ki sla kiba soh ha ki? Phi tip aïu kine ki sla ki leh? Ki long thik kum ka karkhana shna jingbam kaba trei kam da ka bor jong ka jingshai bad ka jingshit ka sngi. Ha ka por mynsngi ki sla dieng sla siej ki kjit ia ka lyer jakhlia (Carbon dioxide) na ka Mariang ban shna jingbam katba ka pynmih bujli pat da ka lyer khuid (Oxygen) bad shiteng na ka lyer khuid oxygen kaba don ha ka Mariang la pynmih da ki dieng ki siej. Hato ngi la ju pyrkhat aïu kan jia ia ka pyrthei ka mariang lada yn weng bad pynduh noh ia ki dieng ki siej ne ki khlaw ki btap jongngi baroh ? Khlem artatien ka pyrthei ka mariang hi baroh kawei kan lynguh tang da ka lyer jakhlia carbon dioxide ka bym bit satia ia u briew lymne ia u mrad ban ring bad pynhiar mynsiem. Ha kata ka por ki jingpang sniew bym don thylliej ban batai kin roi kin boi bad kin kynrup ia u bynriew bad ia ki kynja ba im bakhih baroh ha sla mariang bad khlem artatien ka jingiap kan sar ia ka sla pyrthei baroh kawei. Ngi dei ban sngewthuh namar kata, ba ki sla dieng sla siej ki dei ki tor jong ka Mariang. Lada u bynriew u pynduh pynjot ia ki khlaw ki btap u pynjot ia ki tor ka Mariang.

Ki khlaw ki btap bad ki dieng ki siej nalar ba ki long ki tor jong ka Mariang , ki long ruh ki nongbat nongsumar jorig ka sboh ka sbur bad ka dewlor. Ki thied jong ki ym tang ba ki

ksah ki ksam ha ka Mei-ramew ki da bat skhem ruh ia ka dewlor ba kan nym tuid nym pra bad ba u slap ka lyer kin nym pharia bad rong noh ia ka. Haba ka dewlor ka sah hajuh ka nang rben katba nang ñaid ki sngi bad ki snem bad ka long kaba kordor eh na ka bynta ki jingthung jingtep namar ba dei tang ma ka kaba don ia ka bor ban sei ban pynmih. Ha kane ka dewlor ki don bun ki met bin bin kum ka nitrogen, ka phosphorous bad ka potassium kiba long jingbam ban tei ia ki jingthung jingtep bad ki dieng ki siej. Lada la weng noh ia ka dewlor ka khyndew kan kylla dewksang ka bym donbor shuh ban sei ban pynmih. Ki ri shyiap ki kylla long ri shyiap, bañap bad ba lyngki namar ba ka dewlor kam don shuh. Ngim dei ban klet ba ka sla mariang ka shim por 600 snem ban lum ban kynshew shi-inshi ka dewlor.

Nalor kitei ki kam bakhraw kiba ki khlaw ki btap bad ki dieng ki siej ki shakri ia ka pyrthei ka mariang, ki ñarap ban pynlang dewlor shuh shuh halor ka dewlor ba ki jingthung jingtep bad ki dieng ki siej kin san kin plung kyrhai. Ka history jong ka nongbah Babylon ba pawnam hyndai, ka nongbah Harappa bad Mahenjodaro ha them jong ka Wah Indus ki long ki nuksa kumno ki jah rngai na sla pyrthei bad ki kylla ri shyiap namar ba ki briew jong ki kim suitñiew bad burom ia ki aiñ ka Mariang da kaba ki leh pathar bad pynduh ia ki khlaw ki btap bad ki dieng ki siej baroh kiba don sawdong jong ki. Namar ka jingkhwan bad jinglalot ki hap ban siew ka dor kaba rem. Ka Mariang ka ñeng pyrshah bad u slap ka lyer ki

kylla long ki nongshun jong ki. Namar ba ym don shuh ki khlaw ki btap bad ki dieng ki siej ki ban teh ban bat ia ka dewlor u slap bad ka lyer ki pynpra bad rong noh ia ka. Ka rep ka riang kam long shuh, ki dieng ki siej kim mih shuh bad baroh kaba don sawdong jong ki ka kylla synlen dewksang. Haba ka thung ka tep bad ka rep ka riang kam long shuh, ka wan ka nemsniew bad ka iapthem. Ki briew ki hap ban phet sakma bad ki kjat sngi ryngkat u slap ka lyer ki pynkylla ri shyiap ia ki. Ai ba kane ka jingshem jong ki riewstad kan long ka jingmaham ia kane ka pateng. Ka jingkhwan bad jinglalot kala pynlong ia ki briew jong kane ka juk ban pom bad lute khlem jingisynei ia ki dieng ki siej bad ki khlaw ki btap bad ka por ka la dei ba kin sngewthuh bad ithuh ia ki dak jong ka Mariang lada ngi kwah ban pynim ia ka pateng ka ban wan.

Ki riewstad saian ki iathuh ba ki khlaw ki btap bad ki dieng ki siej ki don ka bor ban ring ia u slap bad ka lyer. Ban shem ia kane ka jingshisha nyngkong eh ngi dei ban sngewthuh kumno bad ha kano ka rukom la pynlong ia u slap? Ki kjat sngi ki hap halor ki pung, ki wah ki duriaw bad ki dieng ki siej bad ki pynmih ia ka jynhaw um. Ia kane ka jynhaw um la rong noh shajrong ha ka dur u lyoh. Ynda une u lyoh u ia takhuh bad ka lyer khriat ha suiñbneng u kylla um bad hap ha ka dur jong u slap. Ha ri lum une u lyoh slap ba khia u ia takhuh ia ki lum bad kylla slap. Hynrei ha ri thor bym don lum une u lyoh u ia takhuh bad ki khlaw bad u kylla

slap. Ka long ruh kaba shisha ba ki khlaw ki btap bad ki dieng ki siej ki pynmih jynhaw um bad ynda kila kylla lyoh ki hap pat ha ka dur jong u slap. Ha ki jaka thor bym don khlaw don btap u lyoh slap u ïaid lait namar ba ym don ba tan ba kjit ia u. Khnang ba ki ri thor madan kin ïoh slap uba biang ki dei ban don ki khlaw ki btap lym kumta kin kylla ri tyrkhong ri ryngkhiang.

Lada ngi kren pat ia ki jingmyntoi ba ki khlaw ki btap ki ai ia ngi, kiba ngi ïohi da la ki jong ki khmat; ym lah ban len ba ki long kum ka jaka jingkynshew kaba pyndap pynbiang la jan ia ki jingdonkam baroh jong u briew. Ki ai ia ngi kyrhai ki dieng ki siej, ki lyntang ki thaboh, ki soh ki pai, ki jhur ki jhep, ki phlang ki kynbat bad ki ñiut ki ñier kiba u briew u donkam. Hynrei katba ki jingdonkam jong u briew ki nangbun katta pat ka jinglute bad jingpynjot ia ki khlaw ki btap ka nang jur. Horkit hordang ngim dei ban leh marklet ba ki khlaw ki btap ki long ka spah ba la kynshew namar u bynriew bad namar ki jingthaw jingpynlong baroh ha ka Mariang. Nalor ba ki khlaw ki btap ki pynbiang ia ki jingdonkam jong u bynriew, um dei ban klet ba ki dei ruh ki nongpynïaid beit pynïaid ryntih jong ka jingshit jingkhriat jong ka Mariang. Nalor kine baroh putet, ki khlaw ki btap ki long ki nongpynkhuid lyer jakhlia bad ki nongpyndap 'erkhuid ha ka pyrthei ka mariang nalor ba ki long ki nongsumar ia ka dewlor bad ki nongpynlang ia ka sboh ka sbur ha ka dewlor. Ka jingpule kaba sani ruh ka ïathuh ba ki khlaw ki btap bad ki dieng ki siej ki long ki

nongkynshew um ha ramew ban bsa ia ki wahduit bad ki wahrit, ki pung ki pukri bad u briew u mrad, ki jingthung ki jingtep, ki sim ki doh bad baroh ki jingpynlong ha sla mariang kin ioh kyrhai ka umbam ka umdih. Ha kane ka juk jong ka saian bad ka technology ka pyrthei ka pang jingsawa (noise polution) bad tang ki khlaw ki btap bad ki dieng ki siej kiba lah ban nguid ia ka jingsawa kaba pynmysaw ia ka jingkoit jingkhiah jong ki jingthaw shityllup ka pyrthei. Namar kata, u bynriew u la dei ban shemphang ia kine ki jingshisha baroh bad ban kiar na kaba leh pathar ia ki khlaw ki btap.

Ki tymmen jongngi ki long kiba stad bad kiba shemphang biang biang ia ki aifn ka Mariang da kaba sumar kyndong ia ki la, ha ka trei ka ktah ne ka rep ka riang. Lada jia ba ki rep ki riang kim ju pynngat thala ia ki dieng ki siej. Ia ki dieng kiba heh ki shu ngor ba kin sei lung pat. Ha ki jaka kiba don tang ki dieng rit pat ki ri ia ki dieng symbai. Ha ki jaka bym don dieng don siej pat ki thung ki bet namar ki sngewthuh ia ka dor jong ki. Ia ki dieng bha ki pud ki sumar bad haba kin aiding ia ki lyngkha ki risai ki da sar ki da pynkhuid baroh sawdong ba ka ding kan nym lah jliah pathar. Ha ki tlong-um ki buh ka kuna ka adong ba ym bit ban pom ia ki dieng ki siej ioh ba ka um ka rit ka ngat noh. Harud shnong rud thaw ki buh da ki 'lawadong 'lawkyntang ne ki ri-iing ri-bynta ba ki briew kin thung dieng thung siej ban iada ia ka shnong ka thaw na u Kyllang ne u Niamsum. Kine ki bat ia ka jingiaid beit iaid ryntih ha ka Mariang bad ban khang lad khang lynti

ia u shnong u thaw ban nym iaid-wir iaid-pur, ban long ki trai shnong bad ki nongioh kynti ia kane ka ri kaba itynnad bad ithiang shisnieh ha ka pyrthei.

LYNNONG 7

Ka Jingthung Dieng

Ki khlaw ki btap ki la khyllam kila kyllon bad ki lum ki wah kila lyngkhuid. Ka dewlor ka tuid ka twa ha ka jingshoh u slap bad ka lyer. Ki um ki wah kila sdang ringswai bad ki pung ki nan ki la' sdang rngad. Lada kane ka jinglong kan iai neh ngim tip shuh shano kane kan lam. Ngi la kam ha ka juk kaba u mynhyndai u la iohi rngai mynba u ong ba ka juk kan poi ba ki lum kin kyang, ki khlaw kin ud kin iam bad ki wahbah bad ki wahrit kin lynñiar kliang. Ka sla mariang ka ud ka iam ba ka khwan bad ka lalot u bynriew ka dung kura ia ka khlem jingisynei. Ia ki aiñ jong ka la kheñ dewthala da ka

jinglute bad jingleh jubor. Ka dohnud u bynriew ka nang threw katba ka nang ioh bad ka jingrunar khlem pyrkhat ka nangjur. Ka Mariang kaba long ka kmie ka la pang kala khrew bad kan num lah shuh ban khie khlieh lymda ka dohnud u bynriew ka kylla. Ki khlaw kiba ai jingkmien, jingtnge bad jingpynbiang kyrhai kim don shuh. Ki um ki wah kiba pynhun pynshngiam ki dap da ki jakhlia jakhlait bad ki kynja bih har rukom. Lada ka jinglalot kam kynriah na u bynriew bad ba ka jingtipbriew sa shisien pat kam synshar, ka jingiaid ryntih kaba ju don ha ka Mariang kan duh noh bad kan lynsher pyrshah ia baroh ki jingpynlong ka Mariang.


Ha ka dor jong ka rep ka riang bad ki den um ngi la duh bun ki khlaw ki btap. Katba ha ka dor jong ka jinglalot ngi la duh kham bun. Bun ki khlaw ki btap kiba u Ni u Kong ki la ieh shadien na ka bynta ki pateng ki ban wan ngi la byndi ia ki bad ailad ia ki riewrunar khleru dohnud ban lute. Ha ka dor jong u sbai ki synlen ki lyngkhuid ki lum ki wah. Lada kan iai long kumne ka lawei jong ka ri bad ka jaitbynriew ka don ha ka jingsyier. Kumno keiñ ngin pyllait na kane ka sohsat. Ka ri bad ka jaitbynriew ka donkam ia ka jubab kaba hok bad ba sngur lym kumta ka jingbym kyrmen ka ap ha jingkheng ia ki jingpynlong baroh ha ka Mariang

Hato ngi ju bna katno heceter ki khlaw ngi duh shi snem? Phi ju peitkai katno tylli ki kali kit dieng ki hiar shisngi shisngi bad katno hajar thup ba ngi thang shisngi shisngi ha ki dpei bad ki pajwa thang shun ! Kine keiñ ki dei ki nongshun kiba

kit noh ia ka jingim na ka ri jongngi. Lada ngim don da kano kano ka lad ban khang ka dewlor baroh na ka ri jongngi kan tuid sha ri thor bad kan sah sa tang ka dewksang dewlyngki ka bym don bor shuh ban sei ban pynmih. Lada ki lum ba pyngngad, ba itynnad bad ba seisoj jong ngi kin kylla long kiba iap bad ba lyngki tang namar ka daw jong ka jinglalot spah khlem pyrkhat, kan long kaei kaei ka ban pynpait ia ka dohnud jongngi.

Ki riewstad ki ong ba ka jingblaw bad jingsngewsih kam ju pynkha sbai. Ka khot ia ngi ban trei bad ban pyrkhat. Ym don kaei kaei kaba u briew um lah ban leh lada u mon. Ka Mariang kam adong ia u briew ban pyndonkam ia ki dieng ki siej hynrei ka adong ia u ba un lute bad leh thurmur. La ka jinglalot spah ka la khring ia kiba bun ban lute bad pynjot ia ki khlaw ki btap hynrei to ai ba ka jaitbynriew pat kan pynkyndit bynriew ia ki sha ka jinghusiar bad jinglong adkar. Hooiid ngi la duh hajar hajar hecter ki khlaw ki btap, ai ba ka jingtipbriew pat kan khyllie biang ia kine ki khlaw ba la duh.

Ka Sorkar ha ka jingkit khlieh jong ka kala buh ia ka Social Forestry ban hikar thung dieng ia ki briew bad ai symbai ei ia ki ban thung ha la ki bri ki bsah bad ki khyndew ki shyrap. Ngim dei ban khmih lynti tang ia ka sorkar ban leh ia kane ka kam. Ka long ka kamram jong uwei pa uwei u nongshong shnong ban thung dieng lada ngi angnud ba ka ri jongngi kan dap kan biang bad kan pahuh pahai. Ka Mariang ka ai sngewbha ia ki dieng ki siej ba u briew un pyndonkam,



u briew pat u dei ban sngewthuh ia kiba kumno dei ban khet bad pyndonkam bad ia kino pat u dei ban ri ban sumar. Shisien ba u la pom bad pynngat ia kino kino ki dieng, um dei pat ban klet ban thung bujli ha ka jaka jong ki. Dei tang kane ka jingshemphang kaba ka Mariang ka kwah na u briew ba ka Mariang kum ka kmie kaba kdup ba kynthup ia u kan long kaba koit ba khiah krat.

Ym lah ban len ba ki khlaw ki btap bad ki dieng ki siej ki long ki nongpyndap pynbiang ia ki jingdonkam jong u briew naduh ki soh ki pai, ki jhur ki jhep, ki jyrmie ki jyrthang, ki shriew ki phan bad ki phlang ki kynbat, ki long ruh ki nongbsa ia ki jingdup jingri bad ia baroh ki jingthaw jingpynlong ha ka mariang. Namar ki jingdonkam jong u briew na ki khlaw ki btap, ki dieng ki siej ki bun eh bad ki lah ban lut noh; donkam ia u ba un thung bad pynroj khnang ba un nym khuslai eiei.

Ka Social Forestry ka ai ka nuksa da kaba thung dieng ha ki jaka kiba khali, ha ki arliang surok, ha ki jaka paidbah bym don dieng, ha ki compound skul bad college, ha ki compound iingmane, ha ki compound durbar shnong bad ka kular ruh ban pynthung dieng ha kino kino ki jaka kiba ki trai khyndew ki ai. Lymda u paid nongshong shnong u sngewthuh ia la ka jong ka kamram bad u ia snoh kti lang bad ka sorkar; kan da long kaba eh ban khyllie pat ia ki khlaw ki btap kiba ngi la duh.

LYNNONG - 8

Ki Dpei, Ki Pajwa bad kiwei

Lehse kane kan pynlyngngoh baler ba ngi dei ban ia kren shaphang ki dpei, ki pajwa, ki tyndur bad ki krem-thang nga. Ki lyngwiar dpei u Khasi ki long ki shlem jong ka longiing-longsem bad ki nongsain dur jong ka pyrkhar ka pyrdain - ki kpep jong ka kolshor bad literature jong ka jaitbynriew Nangne ki tuid ki punnan bad ki puskam, ki kom bad ki khanatang ban lyngsyun ka pyrkhar ka pyrdain bad nangne ki her ki phniang ki sur jingriew jong ka maryngot maryntheng bad ka duitara kiba kynthar ia ka jaitghat jingfren bad jingngam mynsiem. Nangne ruh ka palah ka lymbia'i ka saithma ka saithkren, ka sengkur ka sengkha ba ka jaitbynriew kan laid da ka jingphuhmat shilynter.

Ha ki por hyndai kane ka jinglong ka bit ka biang ba dang don byllai ki ding ki siej bad ki khlaw ki btap. Mynta, ki khlaw baroh naruh nong ki la lut bad ki briew kila hap ban leit jingai bah ban wad dieng-iap. Khlem artatien ki dpei sliew-ding ha ka juk mynta ki kylla long ki nongshun jong ki dieng ki siej bad ki khlaw ki btap - ki nongshun jong ka Mariang hi. Bun ki iing Khasi ki pynlut ia ka tlang bad ka pyrem ha kaba lum dieng ban loh shet loh tiaw ha ka por lyiur. Kane ka la lute bor bah ia ka bormet bad bor trei ki briew. Ha ka jingwad

bniah la lap ba kawei kawei ka iing Khasi ka pyndonkam ym duna 200 kit ki dieng shisnem shisnem, kata ruh lada ym ri sniang ym ri syiar. Lada kane ka jinglong ka iaine katno slem eh kei ki dieng ki siej bad ki khlaw ki btap jongngi kin shan !

Bun na ngi lehse ngim tip haduh katno hecter ki khlaw ngi pynduh shisngi shisngi tang ha kaba lurn diengiap na ka bynta ki dpei jongngi. Tang hapoh sor Shillong ki dpei ki bam haduh ar hecter eiei ki khlaw shisngi. Ka jingwad bniah ruh ka iathuh ba 95% na ka 100% ki dpei jongngi kim long kiba syor namar lai bynta na ka saw bynta jong ka ding ka shu lait ei sharud. Khamtam ha nongkyndong bun na ki dpei ki long kiba tдем bad bym syor ding bad bun na ki iing ki long kiba sop-pring. Ki riewstad jong ka Medical Science ki lap ba kano kano ka kynthei kaba shet jingshet ha kum kine ki dpei hapdeng lai bad saw kynta shisngi ka lah ban kjit ia u tдем uba ia ryngkat kumba 200 tylli ki sikret sha ki tor jong ka. Namar kata, ki dpei kiba tдем bad bym syor ym tang ki pynsep ei ia ka ding hynrei ki long kiba mynsaw ruh ia ka jingkoit jingkhiah jong ki briew.

Kane ka jingong lehse kani pynsgew sammut ia ki nongkyndong kiba don byllai ki dieng ki siej bad kiba shaniah tylli ia ka shet ka tiaw ha ki dpei. Hynrei kin ia mynjur pat bad kane ka jingshisha ba ki dpei jong ki ki long kiba tдем bad bym syor ding. Kane ka long kawei na ki dawbah balei ba ki nongkyndong kim da long kiba koit ba khiah krat khamtam ki

kynthei. Hynrei ka mat kaba kham kongsan ba ngin ia kren hangne ka long ka jingpynsep ei dia ki phew phew hecter ki khlaw ki blat shisngi shisngi ha ki dpei jongngi. Lada ki briew kim kyila bad ba ngi aang shaniah ia ka shet ka tiaw tang ha ki dpei lehse ym slem ba ki khlaw jongngi kin lut noh. Wat ki briew kiba shong ba sah ha sor ki wan kit dieng-thang na nongkyndong ha ka dor kaba rem. Ka petrol kaba ngi dei ban pyndonkam na ka bynta kwei pat ki kam kiba kham donkam ngi hap ban pynlut na ka bynta ban kit dieng-thang.

Ha kine ki snem ka la don khyndiat ka jingkylla ha ka rukom shet rukom tiaw. Mynta, khamtam ha sor ki la pyndonkam da ki stove umphniang sharak, da ki gas stove bad ki dpei electric. Kine ki rukom dpei ym tang ba ki tiar ki tar ki khuid ki suba wat ki iing ki sem ruh ki lait na ka sop pring bad ki kham kloi shibun ban shet ban tiaw. Ki briew ki kham lait na ka pang ka shitom namar ki lait ban ring bad pynhiar mynsiem ia ka tдем ding. Ka da long shisha kaba kmen ban ioh ki iing shetja kiba khuid ba suba kiba lait war na u tдем na u pring. Nalor kata, ka jingpyndonkam ia kitei ki rukom shet ba thymmai ki pynduna ym tang ia ka jinglut ka jingsep hynrei ki kham pynioh por ruh ia ki briew. Mynta ka ding kam sepei shuh namar ba lah ban pynlip bad pynmeh katba ngi donkam.

Kane ka dei ka yuk ka electric ha kaba la jan baroh ki nongkyndong kila ich bad kan long kaba myntoi shibun ia ki

lada ki shim ia kane ka kabu. Da kaba leh kumne ki dieng ki siej bad ki khlaw ki btap kin nym lut. Nalorkata, kiri kham ioh por ruh ban trei ban ktah bad ban kamai. Lada baroh: ngi pdiang ia kitei ki rukom shet rukom tiew thymmai ka ri jongngi kan nym kyrduh dieng kyrduh siej lano lano ruh.

Bun ngi pyrkhat ha ki h̄lut ki h̄ar ki long tang ki atiar ba bit ban bam tang ki mrad ki mreng bad ki jingri jingdup ne kiba lah ban long tang ki kynja sboh. Ki riewstad mynta ki lap ba kine ki lah ban pyemih ka gas ha kaba ngi lah ban pyndonkam ha kaba shet ba tiew ha ka dor kaba tad eh. Kane ka pyini ba ha ka Mariang baroh ki kynja met ki long kiba myntoi ia u briew Tang namar ban shet ia ka ja ka jhur wat ai ba ngin long nongshun ia ka Mariang Mynta lei lei ki riewstad kila lap sa ia ki bor kiat sngi (solar energy) ha kaba ngi lah ban shet ban tiew Ka ri jongngi ka ioh sngi 150 haduh 200 sngi shisnem bad kane kan kham pynduna shuh shuh ia ka jingduh bad jingjutor ki khlaw ki btap bad ngin kham riewbha shibun da kaba shim ia kine ki lad ki kabu.

Tang ha ka jyila Meghalaya ki don ym duna ia ka 10 lakh tylli ki dpei kiba shew ding da u mga ne da ki dieng Khamtam lei lei ki pajwa thangshun ki long kum ki rakot bam khlaw. Ki jaka kiba mynno mynno ki long ki lawbah lawsan mynta kim don dieng shuh wat tang ban thang. Ka Ri Bhoi kaba tap synnia da ki khlaw ba rhen mynta ka stang iar ha ka jingthang mga. Ka por nainar kata, kam slem shuh ba kane ka jingkhwan bad jinglalot spah u briew kan pyntyrykhong

riaw ia ka ri jongngi haduh ba ka thung ka tep bad ka rep ka riang kan da duh kan da tyrkhong. Ki jaka kiba mynno mynno ki long ki thiar jong u soh u kwai mynta ki la kylla shrah namar ba ka khlam bad ka tram kala ban. Lada ngi iet ia la ka jong ka ri shisyndon ngi la dei ban sangeh ka thang pajwa, ka thang rnga bad ka thang shyrti bad lada ngim patlaw ngin babe kylla ynda ka Mariang kala kylla nongshun pyrshah ia u briew.

LYNNONG - 9

U Briew bad ki sim ki doh

Phi ju peit shin kumno ki sim ki leh haba ki kynja khlieng ne kynja dkhoh ki swait ki her ? Kumne kumne kin ai khubor ha la ki para sim bad para jingthaw ba ka jingma ka don bad ba kin husiar ia lade. Ki sngewthuh ia ka jingma bad ki husiar ia la ka jingim thik kumba husiar ki briew haba ka jingma ka don. Ka bor sngewthuh kaba maian ka trei hapoh jong ki kumba phieng u briew haba ka jingma ka don. Katno ngut na ngi kiba iohi ia ka Kympiat kumno ka pah ka kyrkait na kawei ka dong sha kawei pat ka dong jong ka khlaw haba ka iohi briew. Kumjuh ruh U Kaitor haba u iohi ba rung briew ha khlaw.

Kine kj dei ki nongai khubor jong ka khlaw: ki nongsyntiat kiba iathuh ba u nongpynjot u rung sha ki jaka shong jaka sah jong ki bad ba baroh ki jingthaw ha ka khlaw ki dei ban phikir ia la ka jingim.

Kawer kaba shoh ha ka jingnut jongngi ka long balei mo ba ki sim ki doh ki ñiew ia u briew u nongshun jong ki uba runar la kat ka khlieng ka dkhoh. Namar ki tip ba u briew u dei u nongpynjot jong ka shong ka sah jong ki bad u nongpynduh ym tang ia ki jingbam jingdih jong ki hynrei u nongshun ba radbah wat jong ka jingim jong ki hi. Wat la u Nongthaw hi u pynlong ia u bynriew u syiem jong ka sla mariang, u Nongthaw hi u pangnud ban iohi ia ka jingrunar ba khlem dohnud jong u; u bym salia ban pynduh thiaw ia kiwei pat ki para jingthaw na sla mariang.

Ki dak ki shin ha ka Mariang ki ai ka jingstad ba u bynriew un sngewthuh ba ki sim ki doh bad ki mrad ki mreng kim dei tang ki jingkhawai shngiam ba pynhun ia ka dohnud jong u hynrei ki lok kiba don ia kajuh ka hok hormot ban im ban khii ha sla mariang na ka bynta ka jingbha bad jingmyntoi jong u hi. Lada u bynriew u kwah ban im ka jingim kaba kmen bad kaba palei, nyngkong eh u dei ban tip kumno ban im ha ka jingsuk bad jingpalei bad kiwei pat ki para jingthaw shityllup ka Mariang. Lada kane ka jingshemphang kam parpaiñ ha ka jingim jong u, khlem artatien un long uba jynjar bad kordit sat.

Ha kine ki khyndiat snem ka la don ka jingtah ia ka

dohnud jong ki riewpyrkhat haba ki iohi ia ka jingjulong bad jingduh jait jong ki mrad ki mreng bad ki sim ki doh bad ki mrad ki mreng kiba u ju iohi kim don shuh. Ki sngewthuh ba lada kine kim don shuh na sla khyndew ka pyrthei hi kan long kaba kynjah bad ba khlem dur khlem dar. Ka shai kdar ha u ba lada u dei ban im kaba kum kata ka jinglong, ka jingkmien bad jingsngewbha kaba long ka mgiew jong ka jingim jong u kan iohnoh ia u. Ka jingblaw bad jingtingam kan synshar ia ki khlaw ki btap syriem kum ka iingjah.

Hapdeng jong kine ki syngwai pyrkhat ki riew shemphang ki ieng ban dawa na ki bor synshar ia ka jaka ba kyrpang ba kine ki mrad ki mreng bad ki sim ki doh ba kin shong kin sah bad ba kin roi kin par. U mynbarim haba u buh ia ki Lawlyngdoh bad ki Lawkyntang kam mut eh tang ban pynshong pynsah ia u ryngkew u basa, u mang ruh ba kine kin long ki jaka shong jaka sah jong ki sim ki doh bad ki mrad ki mreng. Ka Mariang ka la dep ai jinghikai ia ki ba ka jingsuk jingkyinjai jong u bynriew ka shong shibun ha kaba u sngewthuh ba kine ki para jingthaw ki long ka bynta jong ka jingim jong u. Hynrei ka matti ba runar jong u bynriew kam ai jingsuk ia ki hangta ruh: ba ki riew pyrkhat kim banse ban pan kyrpang na ki bor synshar ban buh ki khlaw ba kyrpang kum ki Wild Life Sanctuary na ka bynta jong kine ki jingthaw ba kin im suk im saiñ hangta. Ha ka jylla Meghalaya ngi don bun ki Reserved Forests kiba ka sorkar ka sumar ym tang ia ki dieng ki siej hynrei ki ai jaka kyrpang ruh ia kine ki jingthaw ba kin im kin khieh bad ba kin roi kin par.

Ngim dei ban klet ba kawei pa kawei ka jingthaw ne jingpynlong ha ka Mariang ka don la ka bhah ka bynta kat-kum ka jingbuh ryntih u Nongthaw u Nongbuh kaba ym bit satia ban pynthut. Ka jingpynthut kaba khyndiat ka lah ban kyrtohy lyndet ia u bynriew namar ba ka jingim jong u hi ka sdien tylli ha ki para jingthaw. Lada u bynriew um nang ban burom ia ki aiñ ka Mariang lymne sngewthuh ba kiwei pat ki para jingthaw ki don ia ka hok ban im bad ban roi ban par; u ruh un jah noh na kane ka sla pyrthei. Ha ri India ki don kumba 45 hajar jait ki dieng ki siej bad ki phlang ki kynbat bad kumba 65 hajar jait ki sim ki doh bad ki mrad ki mreng. La ong ba ha ki khlaw jong ka Meghalaya la lap ba ki don la jan baroh ki jait dieng jait siej bad jait jhur jait jhep bad kumjuh ruh ki jait sim jait doh kiba don ha ri India. Khamtam lei lei ha ka liang jong ki kynbat dawai, ka Meghalaya ka long kawei na kiba riwspah tam. Katne ka long ka jingkyrkhu kaba ka Mariang kala ai sngewbha ia ngi bad kine ki jhur ki jhep, ki phlang ki kynbat, ki jyrmie ki jyrthang ki san ki plung bad ki roi ki par namar ki sim ki doh bad ki mrad ki mreng ki ai buiñ ai sboh ia ki. Namar kata, to ai ba ka jingshemphang kan synshar ia ka jingim u bynriew ba un sngewthuh ba lada u kwah ban im ha sla jong kane ka pyrthei ha ka jingsuk bad jingkmien, u dei ban ai ka jaka shong jaka sah ba kyrpang ia kine ki jingthaw bad shisyndon u la dei ban pei shkor ba ki sim ki doh bad ki mrad ki mreng ki dei ka bynta jong ka jingim jong u.



LYNNONG-10

Īada ia ki Mrad ki Mreng

Ki Sim ki Doh

Haba ka khmat jongngi ka peit sha ki jingitynnad ka Mariang, ka pyndap ia ka dohnud jongngi da ka jingkmn. Haba ngi iohi pat haduh katno ba ka matti u briew ka la pynjot ia ka Mariang ka dohnud jong ngi ka pang. Ki sim kiba ngi ju iohi man ka sngi ngim iohi shuh ia ki. Ki sher syngkai bad ki dohkha kiba ju jngi ha ki thwei bad ki pung kim don shuh bad ki khrnot ki risang kiba ngi ju iohsngew ngim iohsngew shuh. La jan baw h ki jingai shun kiba ka Mariang ka ai ha ki jingthaw bad jingpynlone ba ki dihap mynsiem na ki pukri ka jingim ki la sdang ban jah ngai na sla pyrthei.

Kaba nyngkong eh kaba ngi dei ban iathir iatai ka long ban shem ia ka daw balei ba ki sim ki doh bad ki mrad ki mreng ki sdang jah ngai na sla pyrthei. Ka daw kaba nyngkong eh ka long ka jingngeit ba kine ki long ki jingai jong U Blei ia ngi u bynriew ba ngin bam ngin dihap bad pyniap katba ngi mon. Dei kane ka jingsngewthuh kaba la pynlong ia ngi ban shikar bad pyniap khlem por khlem samoi. Kaba ar pat ka long ka jingpynkhyllm khlein pyrkhat ia ki jaka shong jaka sah jong ki bad pynduh jait ia ki diengson diengpai kiba ki bam. Ha ka jingshyrti lyngkha bad jingthang pajwa u briew u la pynkhyllm lut ia ki diengjri, ki sohjamew, ki

sohrynse, ki sohlakhar bad kiwei haduh ba ki sim ki doh kim
 ioh jingbam shuh. Ki mrad ki mreng kiba ju bam da ki Sohleng,
 ki soh tlai, ki soh lyngkait, ki soh khyllung bad kiwei kim don
 shuh namar ba la pyngngat lut ia ki. Kumta ki sim ki doh bad
 ki mrad ki mreng ki hap ban her iap bad wad da ki jaka kiba
 sngaiñ bad ba don pahuh ka bam ka di. Ka ri War, Ri Bhoi
 bad ri Lyngngam kiba mynno mynno ki long ki ktem jong ki
 skei, ki sier, ki dngiem, ki hati bad kiwei kiwei mynta ki la
 stait iar. Ha ka jingkheĩn jong ki riewstad tang ha ri Khasi ngi
 la duh haduh kumba 60 jait ki sim ki doh bad ki mrad ki
 mreng. Wat la ka Sorkar ka la pynmih bun ki adong adit
 pyrshah ia ka jingpyniap pathar pynban kine ki aiñ kim lah
 satia ban trei kam haduh katta. La ka Sorkar ka la buh ia ki
 khlaw kyrpang pynban ka jingkhwan lalot jong u briew kam
 kheĩn snep ei ei ia kane bad kito ki nongpyntrei kam ia kane
 ka aiñ ma ki hi ki long ki nongsylla. Ka Wild Life Department
 ka la pyrkhing tynggeh khamlam lei lei ban pyniap ia kito ki
 mrad kiba la jan duh jait bad kine ki long 70 jait ki mrad heh,
 22 jait ki mrad bapar bad 41 jait ki kynja baher.

Hynrei baroh ki aiñ kiba kaSorkar ka pynmih ki dei ban
 ioh ka jingkyrshan bad jingiatrei long u paidbah ha ka ri naduh
 u nongsor haduh u nongkyndong. Lym kumta, kine baroh ki
 aiñ kin shu sah tang ki aiñ ha ka kot sada. Ki durbar shnong
 ki dei ban teh pyrkhing ia kine ki aiñ bad pynshitom jur ia kito
 kiba pynkheĩn. Ki briew kiba shong ha ki sor ki don sa kane
 pat ka bynta ba kin leh—


i) Kin sangeh shisyndon ban thied ia kino kino ki tiar ki tar ba la shna na ki shyieng, ki snieh, ki reng bad ki bniat ki mrad.

ii) Kin pyntip mardor sha ki bor sorkar lada ki lap iano iano kiba wan tyrwa die ia kiba kum kine ki jait mar.

iii) Dei ban pynkhih ia ki bor sorkar ban adong pyrkhing ban pynduh bad pynjulor ia ki khlaw 𑜀𑜂𑜆𑜐 btap.

iv) Dei ban pynroi ia ka mynsiem sngewlem ia kine ki para jingthaw da kaba kieng atiar ia lade da ka jingtip ia ki ari ki kanun baroh kiba ia dei bad kane ka kam.

Kum ki briew kiba shai ngi ia dei ban wad bniat balei bad na ka bynta kaei ka daw ba U Blei Trai Kynrad u buh ia kine ki jingthaw ha sla mariang. Lada baroh ngi don ia kaju ka jingthmu khlem artatien ngin iada ia ka jingduh jait irat jong kine ki para jingthaw na sla mariang, namar, ngi da tip skhem ba ka jingduh jait jong ki kan kyrtok lyndet ia ka jingim u briew hi.



LYNNONG - II

Ki Sim ki Doh bad ka Mariang

Hato ngi la ju khan bad pyrkhath aiu kan jia lada baroh ki mrad ki mreng bad ki sim ki doh ki duhjait bad jah syndon thiaw na sla mariang? Ym tang ki khlaw ki btap kin blaw kin tmang hynrei kan lynsher tyngah ia u bynriew bad ei ei kat ba don ha ka mariang. Ka Mariang hi kan scot kan swai kan tyrkhong. Ki dieng ki siej bad ki syntiew ki skud kiba ju kyrshan bad pynkmen ia ka dohnud u briew kin tram kin tyrkhong. Ki wahduit ba kmen bad ki umpohliaw ba kyrsoi kin ran kin rngad bad ka khyndew kaba ju sei ju pynmih ia ki soh ki pai bad ki jingdonkam baroh kan sti kan lyngki. Lada kata ka apot sngi kan jia khlem pep u bynriew bad ki jingpynlong baroh ha ka Mariang kin kyrthat lynga ha ki thwei umksang naba baroh ki jingiaid beiti aid ryntih ha ka Mariang ki la kynriang ki la bakla. Dei kane keiñ ka dawbah balei ba U Blei Trai Kynrad u buh lang ia u bynriew ryngkat kine ki jingpynlong ba kin im suk im saiñ ha sla mariang bad ba kin ioh ia kajuha ka hok nongkynti ban im, ban roi bad ban kmen ha sla pyrthei.

Ban pynshisha kumno bad ha kano ka rukom ki sim ki doh ki don ka jingiadei kaba pyrkhing bad ka Mariang, ki tymmen Khasi ki don kane ka jingiathuh khana pateng ha ki khnong ki khriang ka history. La ong ba ha ki sngi jong u Mailong Raja jong ka Hima Madur-Maskut la don kawei ka

jingjia kaba kham khyllah kaba dang sah nanglit haduh kine
 ki sngi; kaba ai jingmut shibun eh ia ngi ki longdien ban
 sngewthuh haduh katno ka don ka jingiasnoh kaba rdin
 hapdeng ki sim ki doh bad ka Mariang. U Mailong Raja u long
 u syiem uba khraw bad ba donbor uba ka hima jong u ka iar
 naduh Ri Bhoi shaduh Ri Thor Jaintiapur. Ynda ki thma ki
 ktien ki la kut bad ba ka jingsuk jingsain ka la synshar ha ka
 hima, u syiem u la kwah ban leit jingoh ia la ki khun ki hajar.
 Rynghat ki shipai ki swar bad ki nongbud nongrap u shong
 kynshreng halor u kulai dang step ban leit sha ki thain Railong
 jong ka Ri Bhoi. Ka dohnud jong u ka kimen ka phuhmat kum
 u 'nai khadsaw synia haba u iaid lyngba ki khlaw bajagum
 bad ba iai jyrngam ia la pyndeng pyngup da har rukom ki
 syntiew ki skud; ki wahduid bashingam bad ki kshaid ba
 rymphum kiba thadongi halor ki nat ki rafn bad ki mawlong
 mawteh. Ka dohnud jong u ka kmen haba u iohsngew ia ki
 sim ba ki pah bad ki kyrkait. Da shisha ka dohnud jong u ka
 dap haba u iohsngew ia ki risang ba ki pah bad ba u iohi ia ki
 skei bad ki sier ba ki ia ryngkoh ki ia ryngkang bad ki
 'langkhlaw bad ki 'siprut ba ki ia mastieh ha ki pyntha. Lei
 lei haba u iohi ia ki lyngkha ki hali ryngkat u kba ba noh
 pyngkhun bad ba stern, ka dohnud jong u ka shadkmen. Ka
 la dei ruh ka por ban ot bad ba ki nongrep ki ia bun kam ban
 lum ban lang bad ban shoh ban tem. Ha kane ka jingiaid
 lynti u wan poi ha kawei ka lyngkha ba dang dep ot bad ba
 ki song kba ki dang don ha kyntem. Kumta kumta hi ka
 dohnud jong u ka pang bad ka jingbitar ka krew haduh ki

rengmat haba u iohi ia ki spah ki hajar ki saro ki hiar ha kyntem ban puh ia u kba khlem jingtieng bad khlem jingkhaweit.

“Khun ka mare”, u kren dom ha la mynsiem, “haduh katne kine ki sim ki nud ban tuh ban lute pylleĩn pylleĩn ha khmat jong nga u Syiem na ki nongrep bapli khlem jingisynei ! Ym la shonghok ha khmat u briew U Blei ba kum kine ki jait jingthaw kim dei satia ban im! Lehse da kaba nga leh kumta ki khun ki hajar jong nga kin lait na ka thngan ka jingit, ka kyrduh ka kyrtan. Kine ki dei ki nongshun jong ka jingshem bha ki khun ki hajar jongnga. Kane ka dei ka daw tynrai balei ba ka kyrduh kyrtan ka wan ha ka hima jongnga,” u pynkut.

Tang shu poi ha iing syiem u ai ka hukum ba dei ban pynduh jait khoit ia ki kynja saro baroh na ka hima jong u. Ki paitbah ryngkat ki briew jong u ki hukum ia ki shnong ki thaw baroh ba man la uwei pa uwei u shynrang u dei ban shna ‘tieh-patur’ ‘tieh-khnam ban beh thong ia ki saro. Hadien khyndiat bnai ia ki saro baroh la pyniap na ka hima jong u. U Syiem bad ki paitbah ki dap da ka jingkmnen ba mynta ka hima ka la lait na kine ki nongtuh nonglute ia ka jingbam jingdih jong ki. Hynrei phi tip jia aiũ hadien jong kane? Lehse tang kito kiba shemphang ia ki aiũ ka Mariang ki ioh ka jubab kaba biang. Ngim dei ban klet ba ha ka Mariang ka don ka jingiadei iasnoh kaba ryngkhing haduh katta katta hagdeng ki jingthaw bad jingpynlong baroh. Ka aiũ jong ka mariang ka iathuh ba ym don jingthaw satia ha snieh mariang

kaba lah ban im tang da lade hi bad ia kata ka jingpyniaid
 ryntih kaba don ha ka mariang da lei lei ruh ym bit ban pynthut
 ne pynkhongpong. Ka jingpyniap lut ia ki saro ka long pyrshah
 ia ki aiñ ka Mariang kaba pynthut ia ka jingiaid beit ia id ryntih
 kaba don ha ka.

Kane ka khanatang ka iathuh ba shisha ki nongrep ki
 ioh khambun u khaw u kba ha ka snem kaba bud. La ong ka
 la long ka snem kaba nyngkong ba ki nongrep kin ioh pahuh
 pahai u khaw u kba. Ki thiar kiba mynno mynno kim ju dap
 mynta ki borti mam. Ka la don ka jingkmn bad jingphumat
 kaba khraw ha ka hima. Phewse kata ka jingkmn bad
 jingphuhmat ka neh tang shipor.

Balei mo ka long kumta ? Ha ki aiñ jingpyniaid ryntih ka
 Mariang ka don kawei ka jingshisha kaba ym lah ban ia id
 lyndet. Ka long kaba shisha ba ki saro ki puh ki lute ia u
 khaw u kba, hynrei ym dei pat ban kiet ba ki dei ruh ki nongit
 ksaiñ it ksiah ha ki pynthor ki hali mynba u kba u dang lung
 u dang pun. Kine ki sim kim ailad ia kine ki ksaiñ ki ksiah
 ban roi bad ban bam ia u jyntang kba. Haba kine ki sim kim
 don shuh ki ksaiñ ki ksiah ki roi parum pareh bad ki bam
 khlem jingisynei ia ki jyntang kba. Haba kine ki ksaiñ ki ksiah
 ki bam ka iapser bad ka tram ka kiew ha ki pynthor ki hali
 haduh ba u nongrep um ioh ei ei shuh. Kane ka jingjia ka la
 jia ha ka hima Madur Maskut. Ka ser bad ka tram ka rap ka
 boi haduh ba ka jingpynmih khaw mih kba ha ka hima ka hiar
 jrut. Haba ka rep ka riang ka duh, ka jingduk jingkyrduh bad

ka nemsniew ki ban ia ki nongrep. U Syiem Mailong Raja u kulmar jingmut wit bad um tip shuh kumno yn leh. Ynda u la ia shong ia pyrkhat bad ki riewshemphang ha ka hima u sa lap ba ka aiñ kaba u phah pyniäp ia baroh ki saro ka long ka daw kaba long pyrshah ia ki aiñ ka Mariang. Shisyndon u weng noh ia la ka hukum bad suki ka jingäid beit äid ryntih ha ka Mariang ka wan biang ha ka hima jong u.

Hato phi tip balei ba u men khasi um ju riam lymne bam ia ka Phreit? Lehse ha ki khanatang la äathuh ba u briew bad ka phreit ki don ka tang ka kular hana, ba ka phreit ka äathuh bad aibuit ia u bynriew kumno ba u lah ban pyndkut ia u thylliej u khla bad lah ban pynkyllon ia u Diengäei. Namar kane ka daw, ong ka khana tang ba u bynriew un shah ia ka ban bam ia u symbai u rmai na ki lyngkha ki risai jong u. Ka jingwad bniah ka äathuh ba ka phreit ka long kawei ka nongit ksaiñ it ksiah kaba stad. Kaba long ka jingkyrkhu ia u nongrep. U Khasi jongngi u tip ia ka jingmyntoi jong kane ka sim bad u kwah ba kan nangroi parum pareh kum ka paralok ba bha jong u.

Shisyndon ngi la dei ban weng ia ka jingpyrkhat bakla ba ki sim ki doh ki dei ki nongshun u briew hynrei ki nongpyniäid beit pyniäid ryntih ia ki aiñ ka Mariang. Ngim ngeit satia ba don briew ha ka pyrthei ki ban isih ne isaitmet ia ki sim ki doh. Ki long ki jingthaw kiba itynnad bad kiba phylla haduh katta katta la, ha ki khor ki khriam ba ki deng ki kup, la ha ka rukom im rukom shong, la ha ka rukom bam

rukom dih, la ha ka jinglong jingim, la ha ka sur ka dur ne la
 ha ka thiah ka shong, ka thaw iing ka thaw sem. Ka jinglong
 bapher jong ki barabor ka ktik ia ki khmat ka pyrkhat pyrdaiñ
 u briew. Tang bar. shu pyrman ia ka rukom im rukom khih
 jong ki, ki ai ka jingstad bad bor tipthuh ba ngin peiba ia ki
 maian jingjanai jong ka jingim hi. Lyngba ka jingim jong ki ia
 ki khiñ ba la buhrieh ka mariang la pñe ha ngi; kiba long ka
 jubab ia ki jingkylli ba bun syrtap ka jingim.

Lehse kane ka jingong kan pynlyngngoh ia kiba bun
 hynrei ka long kaba shisha. Katno ngut na ngi kiba ju pule
 bad bishar ia ka jingim ki Likai ? Ka Likai kynthei kam ju
 pdem pylleng ne sumar khun da lade. Ia kane ka kam ka ai
 ha u kpa ban leh. Mar ia kut kha pylleng ka khroh ia u kpa
 ban rung ha krem ba ka shna skum. Tang shu rung ka phut ia
 ki sner thapniang jong u baroh haduh ba um lah her shuh.
 Nangta ka lape skhom da ka khyndew ia ka phyllaw krem
 bad ka pynshong ia u hangta. Ia lade pat ka her kylleng ban
 wad jingbam ban 'bisa ia u kpa bad ki khun. Tad ynda ka la
 sngewthuh ba ki khun ki la khlaiñ bad ki la lah ban her ka
 pynpra ia kane ka lape dewbyrtha ba ma u bad ki khun kin
 mih. Balei mo ba ka leh kumne ? Ba kam shaniah mo ia u ba
 ha ka por ba ka pdem bad lung khun ba u lah ban iehnoh ia
 ka bad wad jaka shawei ? Kane ka jingkylli ka siat kum u
 nam pliang ia ka pyrkhat u briew. Ka Mariang ka tip bad ka
 sngewthuh ia ka jinglong jingim jong kawci pa kawci ka
 jingpynlong ha ka pyrthei. Lyngngoh pat ba ha ka por ba ka

thylli kpoh ka snoh rdin ha i: bac kam ju ieng ju riej ban her
ryngkat bad u wat sha ba sep ka sngi tad ba ngen u bnai.
Kane kam ai ka jinghikai ba ktah klongsnam ia u briew !

Phi ju iohsngew ba ki tymmen ki shait sin '*Khun kbeit shapuloit*' ne '*khun tham*' ne '*thwat artdong*' ia uno uno u briew ne ka briew haba ki i shan khmat ia ka jinglong jingim jong ki ! Sngewphylla ban pyrkhat ba ka Shoiñ ne Shapuloit kan kha khun kbeit uba lah ban nguid tylli syndon ia ka kmie ba kha ba pun kumba ngi u bynriew ruh ngi lyngngoh ba na ka kpoh ki briew kiba i donburom k pynkha pynban da ki khun runar ruser ki ban bam im im peit peit ia ka kmie ia u kpa. Sngewphylla ruh ban tip ba ki kmie ki kpa kiba ieit kiba sumar kynthop ia la ki khun kin pynñeh pynsan pynban ia ki kum ki khun tham kiba bam kylla ia la ka kmie bapli haduh ba kan da snai kan da ñap. Ha kajuh ka rukom ruh sngew lyngngoh ban pyrkhat ba u Thwat artdong uba ka jingstad jingsian, jingshalak bad jingñohi jr.gai kaba palat liam ban ia baroh ki jait sim ha khlaw pynban um nang ban thaw ia la ka skum bad u pynpñem pylleng ia la ka men kmie ha ka skum-ra kiwei. Kiba kum kine ki ktik ia ka pyrkhat pyrdaiñ u bynriew ban sngewthuh bad shemphang ia ki pyian mañan jingstad kiba don ha ka Mariang.

Ka Ri War ka long ka ri jong u soh u pai bad jong ki khlaw ki btap kiba ha ki don kyrhai ki kynja soh dieng bad ki syntiew khlaw kiba ki sim ki doh bad ki mrad ki mreng ki bsa ia lade da ki. Ka ju long ruh ka rukom ba wat la ki thung soh

thung kwai ne thung sohmrit thung tymphew kim ju pom ne
 pynngad thala ia ki dieng ki siej kiba long ym tang ka jinglada
 na ka jingshoh u slap ka lyer hynrei ki long ruh k' nongbat ia
 ka dewlor. Kine ki dieng ki siej ym tang ba ki kit ci bah ia ki
 tymphew ki lakor ne ki sohmrit hynrei ki pynmih ru r ia ki soh
 kiba ki sim ki doh bad ki mrad ki mreng ki bsa ia lade da ki.
 Hynrei ha ka jingthang pajwa jong ka juk mynta ki pynduh
 pynjot ia ki dieng ki siej bad ki khlaw ki btap baroh haduh ba
 ki sim ki doh bad ki mrad ki mreng ym tang ba kim don jaka
 shuh ban shong ban sah hynrei kim ioh shuh ban bam, haduh
 ba ki hap ban her iap phet iap ban ri ia la ka jingim. Ka
 jingduh jong ki khlaw ki btap, ki dieng ki siej bad ka jingphet
 iap ki sim ki doh bad ki mrad ki mreng ka lynsher ia ka Ri
 War da ka khlam ka tram ia ki diengsoh diengkwai bad ki
 jingthung jingtep.

Nalor ki shiah seiñiong, ki sohjabuit, ki sohkhendew, ki
 shkor khnai, ki diengsong, ki kya kiba pynmih ki um babang
 bathiang ba ki sim ki doh bad ki khñiang ki ksiah kin kijit kin
 dih; ka ri War ka pynmih ruh kyrhai byllai ki sohkhlaw bad ki
 soh jymie khlaw kiba ki sim bad ki mrad ki hun ki shngiam
 ban bam. Nalor ba ka long ka jaka kaba syaid ka don ruh
 byllai ki umpohliaw kiba ki sim bad ki mrad ki dih bad ki sum
 ki sleh katba ki mon. Ngam tip katno ngut na ngi kiba ioh lad
 ban iohi kumno ki sim ki noh ha ki jri, ki sohjamew, ki
 lapohyat, ki lakhar bad ki sohrynse ? Hangne phin lap ia ki
 khyllah jait sim kiba wan ban bam ia kine ki sohdieng. Don

kiba wan kynhun kynhun, don kiba wan shijur shijur bad don kiba wan shimet shimet. Ki don kiba shu suh wia na jngai bah, don kiba her na u dieng sha u dieng bad don pat kiba her na tbian khyndew. Kane ka pyni ba don ki jait sim kiba lah ban her jngai bad don pat kiba lah ban her tang najan hajan. Hynrei kaba kham eh ia ngi ka long ban ithuh bad tip ia ka kyrteng jong ki lynda ngi long ki riew minot bad riew peitngor ia ka dur bad iinglong jingim jong ki. Katba ngi nang wad bniah shaphang ka jingim jinglong jong ki karta ka nangplie ha ngi ia ki khuiñ jingstad ba la buhrieh ha kpep ka Mariang.

Ha ri Khasi jong ngi ki sim kiba her kuro kuro ne kynhun kynhun ki dei ki Moit, ki Jarji, ki Diphong, ki Langlit, ki phreit, ki Tuta, ki Langlit, Ki Jawhoit, ki sim Tynriew, ki Sohlyngngem bad bun kiwei pat kiba ngim lah ban ñiewtang. Ki don ki jait sim kiba don nongialam kum u Thwat bad u Rynñiaw, ki don oat ki jait sim kiba shu ia her lang tang da ka bor jingiasngewthuh para ma ki. Napdeng jong kine kum ki phreit bad ki Lyngthria kim ju ia khlad paralok baroh shisnem. Wat ha ka por kha por pun ruh ki ia trei lang, kha pylleng lang ha kajuh ka skum bad bsa lang ia ki khuiñ. Ki don pat kiba ia khlad paralok noh ha ka por kha pun shijur shijur kum ki Diphong, ki Paitpuraw, Ki Sim Jiengbai, ki paitpuraw lieh, ki Wahkarku bad ki Moit bad ia lum pat ynda la pynher khun. Ki don pat ki jait sim ki bym ju iaher kynhun lait tang ha ka por kiew (migration) bad ynda ki la poi ha ka jaka ba ki mon bar shong ban sah ki ia pra noh la ka jong ka jong bad ki ia

kynduh lang pat ha ka por ha kin hiar ne kynriah jaka noh. Ki don ki jait sim kum ki Langlit, Ki Kyrkhaw, ki Kairang bad ki Tuta kiba iārap iābeh haba para ma ki ki hap ha ka apot ka bipot. Don pat kiba tang shu iōhi ba ki lok ki hap ha ka apot ka bipot ki heriāp bad phet ia lade. Don ki jait sim haba ki tip ba ki kmie ki kpa ki iāp bad ba ki khun ki dang lung ki leit aibam bad kdup ia ki haduh ba kin da nang ban her. Don pat ki jait sim haba ki iōhi ia ki khun jong kiwei ki leit pyniāp noh. Namarkata, ka long ka jingstad ban pule bad wad bniah ia ka jingim jong ki sim ki doh namar ki don bun kiei kiei ki syrtap jingshemphang kiba u briew u iōh na ka jingim jinglong jong ki. Lyngba jong ka jingim jong ki la plie ia ki khuiñ ka pyrkhat ban sngewthuh kham janai shaphang ka Mariang bad ia baroh ki jingpynlong kiba don ha ka.

Kumno ban ithuh bad tip kyrteng ia kine ki sim lah ban shu batai lyngkot kumne bad kane ruh ka shong shibun eh ha ka jingshalak ki khmat bad ki shkor ban pyniāpher ia ki rong, ka jingheh jingrit bad ka sur ba ki pah. Kito ki sim kiba her kynhun kiba saw baroh shiryñieng, thoh iōng ka khlieh bad ki rmiang thapniang kiba her lang bad kiba stem thohiōng ki rmiang thapniang bad kiba pah 'woit woit' ki dei ki Moit. Kiba saw thohiōng ki dei ki shynrang bad kito kiba stem thoh iōng ki dei ki kynthei. Kito pat ki jait sim kiba iōng baroh shiryñieng bad ba lyngkot tdong bad kiba pah 'Khwait Khwait' ki dei ki khwait. Ia kine shitom ban ithuh uno u shynrang bad kano ka kynthei namar ki don kajuh ka rong. Ki moina pat ki

long kiba ñong thohlieh ki rmiang thapniang, ba stem ki thapkor, ka shyntur bad ki kjat. Kito pat kiba her kynhun ha tbian kiba stem jngum baroh shiryñieng bad ba don ñiuhtrong bad ba pah 'at-at' ki dei ki Lyngat. Kito pat kiba pah 'Korklia korklia' ba stem baroh shiryñieng bad ba ñong ka shyntur bad ki kjat, kiba don ñiuhtrong ki dei ki korklia. Kito pat kiba lam byrليه jngum, ba thoh rong ksar ki thapniang, ba byriong ka shyntur, kiba don ñiuhtrong bad ba i leh sarong kynthrong ki dei ki Diphong. Kito pat kiba lam jyrngam bad thoh saw ka jynshong, ba thoh ñong ki reng ngap ki dei ki pohkrong. Ki Jyllop pat ki long kham heh ia u pohkrong, ba thoh jyrngam ka met bad ki thapniang, ba thoh saw ka jynshong, thohñong ki reng ngap bad ba lam byrtern ka shyntur. Ki don ki kjat kiba khelaiñ bad ki tyrsim kiba nep ban shkam. Namar kata, ban ñiewtang ia ki dur bad ki rong ki rup ki sim ki doh la donkam ban thoh kyrpang kawei ka kitab.

Ka jingwad bniah halor ka khiih ka kai, ka shong ka sah bad ka bam ka dih jong kine ki jingthaw ba rit ka ñathuh ia ngi ba ñiar eh ba kin shong kin sah ha ka juh ka jaka. Ki wan da ka por bad ki kynriah jaka da ka por. Dei namar kata ka daw ba ki briew kiba tip bha ia ka jingam jong ki sim ki doh tang na ka jingpah bad jingher jong ki ki lah ban ñathuh la ki dei ki sim-kiew ne ki sim-sah. Ki sim-kiew ki long kiba bieit bad ki bym ithuh satia ia ka thit ne ka lymmu ne ka shangkhawiah katba ki sim sah pat na jngai ki la husiar bad ka da long kaba eh ban pyngat ia ki ha kitei ki jingriam. Ka daw balei ba ki

sim ki doh kim sah ha kajuh ka jaka ka long namar ba ki wad ia ki jingbam kiba ia dei bad ka met jong ki. Ha kajuh ka por ruh ki wad ia ka jinglong ka suiñbneng ka ban ia hap bad ka jinglong ka met jong ki. Kito kiba ju shong ha kaba khriat kin wad ia ka aïom khriat haba ka aïom shit ka wan ha kato ka jaka ba ki don.

Bunsien ha ka por tlang ngr iohi ia ki hajar bad ki phew hajar tylli ki sim ki wan her na ri thor sha ri lum bad ki shong ki sah shipor haduh Pyrem nangta ki hiar noh sha ri thor. Khamtam ki kynja han, ki kynja paro bad kynja sohlyngngem ñiar eh ba kin sah lyiur ha ri Khasi. Hooïd ki don ruh ki sim kiba im sah baroh khatar bnai kum ki paitpuraw, ki lyngdkhur, ki jawhoit, ki kairiang, ki kyrkhaw, ki diphong, ki lyngat, ki korklia bad kiwei hynrei kiba bun ki leit phai noh ha ka por lyiur. Kawei kaba phylla ka long ba wat la katne jait ki sim ki don ha ki khlaw ki btap jongngi pynban ki im ha ka jingsuk bad jingkmén lait noh ba ki khaweit bad tieng ñap ia ka Shikar, ka Khlieng, Ka Dkhoh, ka Lithasim namar ba ki long ki nongshun jong ki. Wat la hateng hateng ngi iohi ba kine ki sim ki ñapuh ñakajia hynrei horkit hordang kim ju ia buhnud ne pynhiar kput iwei ia iwei pat. Napdeng ki sim kiba jemnud ki dei ki kynja paro khlaw kum ki Jawhoit, ki Knep, ki Kharum, ki Lawarkaw bad ki Sohlyng-ngem. Hynrei shisien pat ba ki la ia bitar ki ia shoh haduh ba kin da ia ñap syndon. Napdeng kiba dom riang bad ba runar dei u Rynñiaw, u Shyrwat, u Thwat bad ka khlieng: khamtam lei lei haba ki

lung khun. Phi ju iohi kumno u Shyrwat ne u rynñiaw ki beh thong ia ka tyngab haba ka wan hajan ka skum jong ki ! Lada ngi mut ban leit shim ia ki khun jong kitei ki jait sim da lei lei kin n/m aili ia u briew. Kin traw, kin trut kin troh bad kin pom da ki thapniang kat naba ioh. Kane ka pynpaw haduh katno ba ki ieit ia la ki khun bad haduh katno ba ki runar ban ialeh ia u nongshun.

Kine baroh ki long ki jinglong tynrai jong ki sim ki doh kiba long ruh ki nongrwai nongsiaw bad ki nongpynshngaiñ ba pyniphuh iphieng ia ki khlaw ki btap. Namar kata, kan da long shisha kaba sngewtynnad ban tip janai ia ka jinglong jingim jong ki khamtam eh kumno bad ha kano ka rukom ba kine ki jingthaw ba rit ki long ki nongiarap bad ki paralok ba kordor jong u bynriew.



LYNNONG - 12

Ki Slim ki Doh : Ki Paralok

Lada ngi la sngewthuh ba ki sim ki doh ki long ki nongteh nongkhum bad ki nongpyniaid beit pyniaid ryntih jong ki aiñ ka Mariang, shisyndon ngi la dei ban ioh ka jingshemphang ba u bynriew um dei satia ban leh kano kano kaba ialam sha ka jingpynduh jait ia ki. Namar, da kaba u leh kumta un pynthut ia ka jingiaid beit iaid ryntih baroh ha ka Mariang. Ka jingsuk bad jingshngaiñ jong u bynriew ha ka Mariang ka long tang haba kiei kiei baroh kiba don ha ka Mariang ki iaiaid beit iaid ryntih. Ka jingkylli kaba mih nangne ka long kumno bad ha kano ka rukom ba ki sim ki doh ki long ki paralok u briew bad ki nongpynphuh pynphieng kiba pyndap ia ka Mariang da ka jingseisoh bad jingkmien? Ka jingjah mgai jong kiba bun ki sim ki doh na ka ri jong ngi khlem artatien ka long kawei na ki dawbah ba kongsan balei ba ki lyngkha ki risai ki swai ki tyrkhong bad ba ki brisoh brikwai ki iap tram. Ka juk kaba mynta ka lah eh ban sngewsarong ia ki jingshem buit kumno ban pyniap ia ki khñiang, ki ksaiñ ki skaiñ kiba wan hap wanboi bad kiba pynsniew ia ki dieng soh dieng kwai bad ka rep ka riang, hynrei ngim dei pat ban klet ba baroh ki jait dawai bih kiba ki nongrep ki synreit ha ki lyngkha ki risai ban ialeh thma pyrshah ia ki khñiang, ki ksaiñ, ki ksiah ki long ki met nongwei (foreign bodies) ha ka Mariang:

kiba don ka borbih ban pyniāp suki ia u bynriew bad ia ki jingthaw jingpynlong baroh ha ka Mariang.

Lymda ngi long ki peitngor bad ki nongwad bniah ngi shitom ban sngewthuh ia ki jingjylliew kiba don ha ka Mariang. Lehse bun na ngi ruh ngi pyrkhāt ba ki sim ki doh ki long tang ki jingthaw kiba U Blei u la buh kyrpang namar jong ngi u bynriew bad namar ka jingpynitynnad ia ka Mariang. Hynrei ki riwstad da ka jingwad bniah ki iāthuh ba ki sim ki doh ki don ka bynta kaba khraw haduh katta katta ha kaba pyniāid beī iāid ryntih ia ki aiñ ka Mariang na ka bynta ka jingmyntoi jong u bynriew bad jong ki jingpynlong baroh kiba don ha sla mariang. Halor kine ki jingshisha ngim don daw ban artatien ba ki sim ki doh ki long ki paralok u bynriew: Kiba khlem ma ki u bynriew un long uba blaw; uba khlem jingkmēn lymne don jingkyrmen.

Ki riwstad ki iāthuh ba ha ka pyrthei ki don kumba 8650 jait ki sim bad ha India ki don 1200 jait kynthup lang ia ki 300 jait kiba shu wan ha ka por Tlang bad phet noh ha ka por Lyiur. Nga ngeit phi ia tip baroh ia ka shnong Jatinga, ka shnor ɔ Khasi kaba don ha North-Cachar Hills. Ki riwstad Mariang ki iāthuh ba ka Jatinga ka dei ka lynti bah jong ki sim kiba her bad kylla jaka na ka pyrthei ba shathie sha ka pyrthei ba shatei bad na ka pyrthei ba shatei sha ka pyrthei ba shathie kiba her miet la bad sngi ban poi sha ka jaka ba ki thmu. Kane ka pynshisha ba ki sim kim ju sah ha kajuha jaka. Ki kylla jaka kat kum ki samoi bad katkum ki aiñ jong

ka jingshit jingkhriat ha ka Mariang. Man ka snem ngi ju iohi ia ki han blei ba ki her da u laiñ na kawei ka dong jong ka pyrthei sha kawei pat ka dong ban beh ia ki samoi.

Ki briew kiba shong ha ki thairi ri War ki iohi bha ia kane ka jinglong ki sim namar naduh ka taiew ba lai jong u bnai October ki sim da ki hajar bad ki phew hajar ki wan kiew na ri Thor sha ri lum ban wad jingbam bad ban sah shipor haduh u bnai April-May bad nangta ki leit phai noh. Hynrei kaba kongsan kaba ngi dei ban tip ka long kiei ki jingmyntoi ba ngi ioh na ki sim. Ki riewstad kiba pule bad bishar ia ka Mariang ki iathuh ia kane ka jingshem jong ki ha kawei ka ri ha Europe. Ha kane ka shnong la don kawei ka pyntha ba seisoh haduh katta katta bad napdeng jong kata ka pyntha ka tuid kawei ka wahduit kaba pynlang ia kawei ka pung kaba heh. Man ka snem da ki phew hajar ki kynja han ki wan ban jngi ha ka. Ynda ki la thait ban jngi ki her sawdong sawdong bad ki dem ha ki dieng kiba don harud jong kane ka pung bad harud jong ki lyngkha. Kane ka pung ka ai um ia baroh kita ki lyngkha bad ki seisoh parum pareh. Suki suki ka jingkhwan bad jinglalot ka rung ha ka dohnud kine ki nongrep bad ki iakut ban pynrngad noh ia ka khnang ba kin ioh jaka rep kham bun. Haba ka pung kam don shuh ki han ruh kim wan shuh ha kane ka jaka. Shen hadien arsnem ki nongrep ki lap ba kata ka pyntha ka duh noh ia ka jingseisoh kaba ju don. Suki ka khlam, ka tram, ka iapiong ka ktah ia ki jingthung jingtep baroh bad ka pyntha kaba ju long mynno mynno ka

jingkmen bad jingkyrmen mynta ka kylla long ka pyntha jong ka jingsngewsih bad jingim bym kyrmen. Hadien kane baroh ki lap ba ka sboh kam don shuh ha ka. Ki sabut ruh ba ka jingsboh baroh jong kata ka pyntha ka shong ha ka jingeit jong ki han. Mynta ba ki han kim don shuh ym don nongpynsboh shuh ia kane ka pyntha ba sa wan ka khlam, ka tram, ka iapiong kaba ktah syndon ia klongsnam ki nongrep. Mynta ki sngewthuh ba ka jingkhwan jinglalot ka pun lynti sha ka lanot. Ia ki aiñ jong ka Mariang la pynbaji khongpong bad haba ki la baji khongpong ki lynsher kylla ia u bynriew.

Kane ka jingshem jong ki riewstad ka pynkyndit thret ia ki briew jong kane ka shnong bad da kawei ka jingmut ki rai ban khyllie biang ia kata ka pung. Hadien katto katne snem ki han ki wan biang kumba mynshuwa bad ka jingsboh bad jingseisoh sa shisien pat ka wan ha kane ka pyntha. Namar kata, ka long kaba mynsaw ban pynthut ia ka jingiaid beit ia id ryntih ha ka Mariang.

Lada u bynriew u kwah ban im ka jingim kaba kmen bad ba suk ha sla pyrthei, u dei ban burom ia ki aiñ ka Mariang. Ngim dei ban klet ba ki sim ym tang ba ki long ki nongpynsboh pynsbur ia ka khyndew; hynrei ki long ruh ki nong it ksaiñ it ksiah kiba stad bad ba ni haduh katta katta. U shoh kyrdoh, u Shoiñ, u Kynjar bad ki sim Jiaw-jiauw ki long ki nong it ksiah it ksaiñ kiba stad tam. Ki im bad ki bsa ia lade da ki. Kine ki sim ki it bad behthong ia ki ksaiñ ki ksiah bad ki puit ki

khñiang bad ka da long kaba eh haduh katta katta ban thok bad buhrieh ia lade na kine ki sim. Phi ju iohi ia u Thwat ne U Rynnñaw kumno u ñalam ia ka kynhun ki sim rit ban thom ia kano kano ka bynta jong ka khlaw ? Ia lade pat thik ki ap ioh mih ki puit ki khñiang kiba heh ba kin kem kin kynrup. Da kane ka rukom ki khang lad ia ki khñiang ki ksiah ki ksaiñ ban roi parum pareh bad pynjot ia ki jingthung jingtep jong u briew.

Ngim dei ruh ban klet ba ki sim ki long ki nong-pynñaoia jong ki dieng ki siej ha ka por ba ki phuh syntiew. Ki sim ki leit ban kjit um na uwei u syntiew sha uwei pat bad da kaba leh kurme ki pynshong kurim ia ki syntiew. Khlem a tatien ngi iohi ia ki spah ki sim ba ki ta dih um syntiew Kya, syntiew Diengsong, syntiew Sohjahuit, syntiew Shigh Seiñjong bad kiwei bad da kane ka rukom ki pyniakynduh ia ki kynthei bad shynrang pan ia shongkurim bad ban pynmin ki soh ki symbai. Phi ju iohi kumno ka Buitkait (humming bird) ba ka her na uwei u syntiew sha uwei u syntiew Shkor khnai ne na uwei u syntiew Kymphad sha uwei ? Kane ka dei ka jingbuh ryntih ka Mariang ha ka plan bakhraw jong ka.

Ki sim ym tang ba ki pynshong kurim ia ki syntiew ki skud, ki long ruh ki nongrep bad nongpyri-saphriang ia ki symbai dieng kylleng kylleng. Ka jingroi jong ki dieng sla tyrpad kylleng ka ri War wad kumjuh jong kiwei kiwei ki jait dieng ka shong eh ha ka jingeit jong ki sim. Khamtam u Sohmrut Khlaw u saphriang kylleng namar ki Lyngat, ki

Paitpuraw, ki Kyrklia bad ki Diphong kiba puh ia ki soh kiba la ih bad eit kat sha ba ki her kylleng kylleng. Wat u Dieng Sal hi u lah ban duh jait lymda la pynroi bad pynphriang ia u da ki sim kiba bam ia ki soh jong u. Hato tang kine lai tylli ki daw kim la biang ia ngi ban sngewthuh haduh katno kine ki sim ki shakri ia u briew bad ia ka Mariang ? Bunsien ngi shait pyrkhat bakla ba ki sim ki dei ki nongpynjot jong ka rep ka riang bac' ka thung ka tep. Ngim dei ruh ban klet ba ki dei pynban ki lok kiba bha tam jong u briew bad ka Mariang. U Men Khasi u shah sngewbha ia ka Phreit ban bam ia u krai u hadem namar u tip ba ka Phreit ka long ka nongpynroi jong ki.



LYNNONG 13

Ki Sim bad Ki Ksaĩñ ki Ksiaħ

Ha Ri India ki don kumba 30,000 jait ki ksaĩñ , ki khñiang bad ki ksiaħ kiba bam bad pynduh, ia ka rep ka riang bad ki jingthung jingtep. Ki riwstad ki řathuh ba uwei uwei u ksaĩñ u bam 200 shah ia ka jingkhia ka met jong u ha ka shisngi. Don napdeng kine ki jait ksaĩñ kiba kha pylleng shisien kha 2000 tylli. Phi ju bishar kai haduh katno tylli ki khun u řiangdkhoh, u řiangtoħriaħ bad u řiangkseħ ki kha shisien kha ! Ne,

haduh katno tylli ka Thapbawa bad ka ñiangramshang ki kha shisien kha ! Nga ngeit phi iohi haduh katno spah katno hajar tylli ki Ñiangtreng bad ki Ñiangtmong ki kha shi samoi samoi. Kan jia aïu keiñ lada kine baroh ki roi bad ki im khlem don mano mano ba pyniäp ia ki ! Hapoh khyndiat snem ki sla jyrngam baroh kin lut na ki khlaw ki btap. Ki nongrep soh ha ka juk mynta ki ud ba ki ksaiñ ki la pynjulong palat ia ki diengsoh diengkwai nalar ba u briew u phikir u sumar bad u pyniäp ia kine ki ksaiñ. Lei lei lada ym don mano mano ba it bad pyniäp ksaiñ ki bri soh bri kwai baroh kin iap kin tyrkhong. Ki tymmien ki ju khang bad maham ia ki khyannah ba kim dei ban siat ia ki sim ha ka por ba ki soh bad ki sohshang ki phuh syntiew namar kine ki sim rit ki long ki nongit ksaiñ bad ki nongpynshong kurim jong ki dieng ki siej. Kawei ka jingshishia ka long ba lada kine ki sim Jiaw-Jiaw ne sim Lyngthria kim iärap it ksaiñ, ki jingthung jingtep bad ki diengsoh diengpai kin nym man kin nym soh namar ki ksaiñ kin pynduh lut khoit ia ki. Kane ka long ka jingshakri ba jar jar jong ki sim ia u bynriew bad u bynriew u la dei ban sngewthuh ban pynshong dor ia ki.

Ki riwstad ki iathuh ba ha ri jongngi ka la don ka jingduh jong ki soh ki pai bad ki jingthung jingtep haduh kumba 30 per cent na ka jingpynjulong jong ki ksaiñ ki khñiang, ki ksiah bad ki kynja khnai kynja risang. Kiba lah ban pynduh bad khanglad ia ka jingroi jong ki dei tang ki sim. Phi ju peit thuh bad bishar haduh katno sien ka paitpuraw ka wan aibam

shisngi shisngi ia la ki khun ha skum ! Ne, haduh katno sien ba u Kylla, u Pohkrong bad ka Korklia ki wan aibam shisngi shisngi ia la ki khun ! Sngewphylla ban tip ba kitei ki sim ki wan aibam haduh kumba 240 sien shisngi shisngi. La pynshisha da ki riewstad ba kawei kawei ka Shoiñ ne ka sim Jiaw-Jiaw ka pyniāp bad bam duh kumba 15,000 tylli ki puit ki ksaiñ bad ki khñiang shisnem shisnem. Kane ka iathuh ia ngi ba artylli ki Shoiñ ne sim Jiaw-Jiaw ki lah ban pynduh haduh kumba 120 million tylli ki ksaiñ ki ksiah ha ka shisnem. Ha kajuh ruh ka rukom ki dkhoh, ki lithasim, ki kbeit bad ki bseiñ ki long ki nongshun thlong mluh thlong sying jong ki kynja khnai bad kynja risang. Kine ki pynduna ia ka jingroi pathar jong kine ki jingthaw bad ki pynryntih ia ka jingiaid beit ha ka Mariang. Hato phi la ju bna ba shijur ki khnai ki lah ban kha roi haduh 240 tylli ha ka shisnem ! Katba kawei ka dkhoh ne uwei u kbeit pat ki lah ban bam doh khnai haduh saw bad san tylli shisngi shisngi. Na kane ngi lah ban sngewthuh haduh katno tylli ki khnai ne ki risang ba shijur ki dkhoh ne ki kbeit ki lah ban pyniāp bad bam doh ha ka shisnem. Dang ha ki khyndiat snem ki briew ha Bangladesh ki kheiñ ba ka dkhoh ka long ka nongwanrah nusib sniew. Mynta ki la sngewthuh ia ka dor jong ka dkhoh da kaba sumar bad shah ia ki ba kin roi. Kaba kum kane ka jingsngewthuh ruh ka dei ban wan ha ka ri jongngi ba ki briew kim dei ban pyniāp thala ia ki sim ki doh namar ba ki long ki nongiarap bad ki paralok jongngi.

Kum ka jaitbynriew kaba ngi thmu ban kiew shaphrang shisyndon ka la dei ban pynioh ha lade ia ka mynsiem thrang ban wad bad sngewthuh ia ka jinglong bad ka dor kaba ki sim ki shakri khlem tyngkai ia u bynriew. Ka jingbymtip ryngkat ka jingngeit thurmur kaba pynbabe kylla. Kynmaw ba ka jingtip bad jingithuh ia kawei pa kawei ka jait sim ka long ka jingstad ba kordor; kaba pynlah ia ngi ban kheiñkor ia ka jingshakri kaba ki ai ia u bynriew bad ka Mariang. Hynrei ban tip bad ithuh shynna bha pat ia ki don kam ia ka jinshalak ki khmat bad ki shkor ryngkat ka bor kynmaw ba maian: katno ka heh katno ka rit, kiba kum kino ki rong ka don bad kumno ka khlieh, u tdong, ki kjat, ka shyntur, ki rengmat, ki thapniang ki long; naba kine ki dei ki dak ba shynna kiba pynithuh bad pyniapher ia kawei na kawei pat ka jait sim. Phi ju shah shkor kumno u Kshaid bad U Jalyeit ki pah ki lyniar ha ka step tlang na u dieng thynram ne nador diengbai ! Ne , kumno u simtung bad ka Lorni ki rwai pangnud ha ka por janmiet ! Da shisha ka long ka maian bah ban shemphang ia ki jingjylliew ka jingim ia kiba la buhrieh ha tyngkhap ka Mariang.

Namar kata, lada ngi kwah ia ka ri kaba seisoh bad khiah krat, kaba lait na ka khlam na ka tram, na ka iapser ka iapiõng; kaba lait na ka jinglute jong ki khñiang ki ksiah bad ki kynja ksaiñ ba har rukom: ki dawai pyniaph khñiang kim dei ka jubab. Ngì dei ban ailad ba ki sim kin roi namar ym tang ba kin shakri ia u briew ha kaba it ksaiñ it ksiah ne pyniaph khnai pyniaph risang hynrei kin bat ia ka jingiaid beit ia id ryntih ha ka Mariang.

LYNNONG-14

Ka jinglong ki Sim

Ki sim ki don la ka rukom im bad rukom jinglong syriem thik kum ki briew. Ki sum ki sleh arsien laisien shisngi. Haba ki dem bad shongthait ki sat ki khyllong bad kim ju kwah ban tyrñium tyrñiam. Kim ailad ba kano kano ka jakhlia jakhlait kan bit ha ka met jong ki. Don ki sim kiba sum ba sleh bad pynkhuid met pynkhuid phad da ka um bad don pat kiba pynkhuid ia lade da ka khyndew. Hynrei baroh pat ki dih um. Ki don ruh katto katne ki sim ki bym ju sum la, da ka um ne da ka khyndew kum ka Lyntait, u Krot, u Kob, Ka Khlieng. U Kynjar, Ka Kyrnpiat bad kiwei. Ki sim kiba pynkhuid met ia lade da ka khyndew ki long u Klew, ka larkhiar, ka Sim Syiar bad kiwei. Kiba bun hi ki sum ki sleh da ka um. Ha ka rukom thaw skum thaw iing ruh ki sim ki iapher kawei na kawei ka jait. Don kiba thaw pyllun khlem jingtap tang ka lynti ban rung ban mih. Don pat ki sim kiba shu wah ia ki skum ha ki tnad diing ne ki tnad siej ne ki kynja sla kum u Rynñiaw, U Jarji, Ki Sim Kya, Ki Sim Shken, Ki Buitkait, Ki Shloiñ bad kiwei. Hynrei kiba bun ki thaw bad tyngkhap ha ki tnad dieng ne ki shakup maw. Kham bun na ki sim ki shna skum da ki ñiut ki ñier bad ki thynram dieng lait noh tang ka Lyntait kaba shna da ka dewbyrtha ha shakup maw. Ha ki jaka pat kiba shitom ban ioh dewbyrtha kum ha Sor Shillong ki shna da ki

sner bad ki ñiut ha ki tnum iing briew. Ki Likai, ki kohkarang, ki Tlit, ki tuta, ki dkhoh, ki Kynjar ki shna ha ki krem dieng ba la don lypa. Katba u Pohkrong bad u Jyllop pat ki da pynshitom ia lade ban khlong thliw ban shna skum. Don pat ki sim kiba torti kti haduh katta ban thaw iing thaw skum kum ka Khar-um, Ka Knep, Ka Lyngdkhur, Ka Jawhoit, Ka Sohlyngngem ba u men Khasi u sa pyniasyriem ia ka jinglong ki briew bad kine ki jingthaw. Ki sim kiba sngewtynnad ban shna skum ha synrang maw ne ha ki shpait maw ki dei ki Simtung, U Simtyngwieng, U Sim Nur, bad ki kynja sim khyndew. U Thwat bad U Kymput ki long ki jingthaw ki bym ju nang ban shna skum. Ki pynpdem khun ia la ki tnga ha ki skum-ra kiwei. Dei narnar kata ka daw ba u men khasi u sa sin thwat artdong ia u briew uba shait leh banang batip, ba kren stad bad leh kyreit katba um don tynrai haei haei ruh.

Wat ha ka bam ka dii ki sim ki iapher kawei na kawei pat. Lah ban pyniabynta ia ki sim ha ka liang ka bam ka dii ha ki lai jait- kiba bam da ki sohdieng bad ki khñiang ki ksiah kum ka Paitpuraw, Ka Diphong, ka Kyrklia, ki Pohkrong, ki Kylla, ki Khwait, Ki Shyrwat, Ki Jyllop bad kiwei. Don pat kiba im tang da ki kynja symbai kynja nai kum ka Phreit, ka khar-um, ka lyngdkhur bad don pat kiba im bad bsa ia lade tang da ki kynja doh kum U Slapiangpiang uba ngi sin Phiang Phiang bam sih, Ka Dkhoh, ka Lithasim, Ka Saiñ, ka Pukni bad kiwei. Nalor kine don ki kynja sim kiba im tang da ki kynja khñiang kynja ksiah kum ki Sim Dkhar, ki shyrwat, ki

thwat, ki rynn̄iaw, ki Jarji, ki Kympiat bad kiwei. Don pat ki sim kiba im tang da ki um syntiew dieng kum ki Sim Kya, ki Buitkait bad kiwei. Ki don ruh ki sim ki bym ju bam ia kino kino ki soh dieng lait noh tang na ka dieng kaba mih ba sei ha kiwei pat ki dieng na ka eit jong ki hi kum ki mangkariang. Bun na ki sim ki thiah mynmiet ha ki tnad dieng khlem skum lait noh tang Ka Phreit, ki Sim Shken, Ki Dkhoh, Ki Jyllop, Ki Tlit, ki tuta, Ki Pohkrong bad kiwei kiba thiah baroh khat-ar bnai ha la ki skum bad ki krem dieng. Ki don ki sim kiba mynsngi kim imat kum u Kob bad don pat ki sim kiba iohi bad sngi bad miet kum ka dkhoh, ka kitbru, u kbeit bad kiwei.

Wat ha ka imlang sahleng ki don ki jait sim kiba iaher kynhun kynhun kum ki Likai, ki Kairiang, Ki kyrkhaw, Ki Lynthria, ki Moit ki Jawhoit bad don pat kiba ia her shijur shijur kum ki Sim Kshaid, ki Korklia, Ki Diphong bad kiwei bad don pat kiba her marwei kum ki Khar-um, ki kynjar, ki Kynpiat bad teng teng ha ki por thaw khun lah ban iohi ia ki ba ki ia her ar-ar. Don ki sim kiba lah ban suh bad her jngai bad don pat kiba her tang ha tbian khyndew bad don pat kiba her na suiñ kum ki kynja khlieng. Hynrei hapdeng kine ki jingīapher baroh ki don ia kawei ka jinglong ba kyrpang - ka jingīaieit bad jingīasngewlem markylliang. Phi ju iohi kumno ki Kairiang ki Kyrkhaw ki leh haba kawei na ki ka ngat ha ka thit ne ka shangkhawiah? Ne, phi ju iohi ia ki tlit bad ki tuta kumno ba ki ia iām ia lynn̄iar haba phi siat iap ia kawei na

ki ? Baroh ki iabeh bad sngewlem haduh ba ka dohnud jong u nongsiat hi ka da kthang. Kane ka pynpaw ia ka jingiajan ia ieit kaba teng teng ngi pyrkhat ba kam don ha ki sim ki doh.

U Men Khasi um long tang u nongpeit ngor hynrei u long ruh u nongbishar bniah ia ki jingjylliew baroh kiba don ha ka Mariang. Da kane u pyniasyriem bad pyniahap dur ia ka jinglong ki sim ki doh had ka jinglong jong ki briew. Ia u briew uba im lali ha ka klim ka awria ki sim ia u 'U Phiang Phiang bam sih', la ki khun pat kiba byrngem byrsit ia la ki kmie ki kpa kum ki laren ki sin 'Khun kbeit Shapuloit'. Ia u briew uba im sarong saphei kynthrung bad pynsnai pynswai ia ki kmie ki kpa da ka jingsngewsih ki sin 'Sim Tyngwieng die ri die kmie.' Ia ka briew pat kaba saitlah bad tam sneng ia la ki kmie ki kpa ki sin 'Ka Paitpuraw saitlah'. Ia ki khun kiba bam duh ia ka kamai kajih ka kmie u kpa ki sin 'Ki Khun tham khun jynreiñ' kiba mih na ka doh bad kiba bam ia ka doh. Ia u briew pat uba pnah thylliej bad ba shitom ban pynrem nia ki sin 'U Jalyeit Umtyngur' bad ia u briew uba sian ba shemphang bad ba iohi jngai ki sin 'U Shyrwat artdong'. Haba u men Khasi pat u kren shaphang ka trei ka ktah ka kamai ka kajih u pyniasyriem ia ka jinglong u briew ne ka briew bad kine ki sim ki doh. Ia u briew ne ka briew kaba torti kti bad ba trei ia kano kano ka kam tang dep ki sin 'Ka khar-um jepra'. Ia u briew pat uba leh sarong kynthrung halor ka shem buit shem lad kiwei bad ba pynlong ia ka kum la ka jong ki sin 'Thwat artdong' uba leh sarong ha ka skum kiwei

namar ba um nang thaw skum da lade. Ia u briew pat uba ap bam na ka tnga khlem jinglehraiñ ki sin 'U Likai' bad ia u briew pat uba leh basian batip khlem tip khlem sngewthuh ki sin 'U Kylla' uba katba nang dymbit ka thit ha ki kjat katta u nang shkam. Ia u briew pat uba heh nia tang ha rympei bad bym ju mih madan ki sin 'U Phrang-ka-kat' bad kumta ter ter. Ka Mariang ha u Khasi ka long ka thup jingkyshew jong ka jingstad baroh kaba kren ia ka longbriew manbriew bad ka imlang sahlang.

Da shisha ka long kaba myntoi ban pule bad tip ia ka jinglong ki sim ki doh: kaba pynproh bad pynpyrkhat jylliew; hynrei kaba kham kongsan ia ngi ban tip ka long ba ki sim ki doh ym tang ba ki long ki nongīarap jong ka Mariang hynrei ki lok ba kordor tam jong u briew. Namar kata, ka long ka kamram ba kyntang jong uwei pa uwei ban iada bad sumar ia kine ki jingthaw da kaba ngi ai ka jaka kaba biang ba kin im kin shong khnang ba ka jingkmnen bad jingsuk kan synshar ia ka pyrthei ha ka jingitynnad bad jingiphuh iphieng.



LYNNONG 15

Ki Mrad bapar: Ki Lok U Briew

Sawdong jongngi ki don bun jait ki mrad ki ba par kum ki tyrpud, ki kyrbei, ki reiñ, ki ñiangmlang, ki ñiangmlir, ki ñiang bshiah, ki ñianglīng, ki ktīar, ki ñiangmlen, ki ñiangkhure, ki bseiñ bad kiwei. Kine baroh ki don la ka bynta ha ka Mariang. Hynrei ka jingngeit kaba la bynshet tynrai ha ngi ka long ba kine ki jait mrad ki dei ki nongshun jong u briew: kiba dait bad pynmysaw ia u. Namar kata, u briew u dei ban ialeh thma pyrshah ia ki. Hynrei ka jingwad bniah jong ki riewstad ka pynshisha ba ki long pynban ki paralok jong u briew kiba don ka bynta kaba khraw ha kaba pynbiang bad pynñaid beit ñaid ryntih ia ki aiñ jong ka Mariang.

Ha kane ka lynnong ngin ñakren shaphang ki bseiñ, ki lok kiba u briew um sngewthuh satia, namar, ka jingngert shimet bad ka jingngeit niam la pynpaw ia ki kum ki jingthaw kiba triem bad ba isaitmet. Dei namar kane ka daw ba ngi tang shu ñohi bseiñ ngi la triem ngi la khaweit baroh shiryñeng. Lada u long uba heh ngi her ñap bad lada u long uba rit ngi shim da ki dieng bad ki maw ban tangon ban lynthem pynñap ia u. Ban weng ia kane ka jingngeit kaba la tap rben ia ka jingmut jingpyrkhat jong ngi shisyndon ngi dei ban tip ia ka jinglong jong ki. U bseiñ u long u jait jingthaw uba kyllut bad bym imat ki khmat kum ki para jingthaw. Hynrei u don pat ka bor-tip-thuh ia kano kano ka kynja jingsawa kaba par ha sla

khyndew. Ki don ruh ka bor maia aïu re kaba phylla ban sngewthuh ia kano kano ka kynja jingkhieh kaba don hamar pyrshah jong u. Ym baroh ki bseïñ ki don bih kumba la pynngeit ia ngi. Tang u Seiñiong, u Seiñstar, Seiñlyngkani, u Seiñjajew, u Seiñjyrngam bad u Seiñhynhoh ki long kiba don bih. Lait nangta bun ki bseïñ ki bym don bih bad ki bym long satia ka jingmysaw ia u briew. Kine ki bseïñ ki bam da ki khnai, ki japieh bad ki kynja khñiang kynja puit.

Kaba shu itieng irunar ia ki bseïñ ka long ba ki pynmih thylliej lir-lir. Ka daw baroh ka long ba hapdeng jong kine ki thylliej paitpnat ki don ki kynja khulpi tyndong lyer kiba pynioh ia ka bor jingsma ban pyniapher ia kiei kiei kiba don ha pyrshah jong u. Da kane ka bor jingsma u bseïñ u sngewthuh thik la kata kaba don hakhmat jong u ka dei ka jingbam ne u nongshun. Ma kine ki pnat thylliej ka lyer ka rung sha ka khulpi lyer ha sad shyntur kaba ãaid beit shaduh jabieng bad pynioh ia ka bor jingsngewthuh ia kiei kiei baroh. Kaba phylla ka long wat la u bseïñ u don ka khmut bad ki thliew khmut pynban kim don ia ka bor sma. Ka khnai ne ka japieh ki lah ban dem khop khlem khieh ha syndah jong u pynban um tip ne iohi ba ki don hangta. Kine ki thliew khmut ki shu long tang ki kynja thliew ban ring bad pynhiar mynsiem katba ka bor sma pat ka don ha ka khulpi lyer ha sad shyntur kaba lah ban ai khubor khaladom sha ka jabieng ban trei kam. Ka jingwad bniah ka pynshisha ba u thylliej paitpnat u long uba donkam eh bad kano kano ka jingmong wat kaba rit eh ruh ka lah ban pyniapher ia u.

Hynrei kaba donkam eh ia ngi ban tip janai ka long kaei ka jingmyntoi ba ki bseiñ ki ai ia u briew bad ha kano ka rukom ki pynñaid beiti ñaid ryntih ia ki aiñ ka Mariang. Ban sngewthuh ia kane ka phang donkam shuwa ban pynkhuid ia ki jingngeit bad jingpyrkhat rim baroh kiba sdien ha ka jabieng jongngi pyrshah ia ki bseiñ. Lym kumta kan jin da la long kaba eh sat ba ngin pdiang ia ki jingshisha baroh kiba don ha ka. Ia kane ka jingshisha lah ban pdiang tang da ka dohnud bad ki jingmut jingpyrkhat ba thymmai ba ki bseiñ ki long ki paralok jong u briew.

Ka ri India ka pynmih bam palat 4000 million tons shisnem shisnem. Hynrei kaba pynklusai ia ki bor pynñaid ka long ba 30 na ka 100 jong katei ka bam kaba pynmih la pynjot da ki khnai bad ki khñjang ki ksiah. Ki riewstad ki lap ba shijur ki khnai ki lah ban pynkha pynroi haduh 850 tylli ha ka shisnem. Ki bseiñ pat ki beh thong bad bam ia ki bad namar kata ka daw kim lah ban roi kumba ki dei ban roi. Ki riewstad ki ñathuh ruh ba ki bseiñ ki ring bad pynhiar mynsiem da ka lyer tngit carbon dioxide. Kane ka ñathuh ia ngi ba ki bseiñ ki long ki nongpynkhuid lyer tngit ha ka mariang.

Ki riewstad dawai dashin ha ka juk mynta ki lap ruh ba ka bih bseiñ ka long ka dawai kaba lah ban pynkoit ia ka jingpang bampong (Homophilia). Nangta ki lap ruh ba ka dawai puh bseiñ kaba bha bad donbor tam dei ka bih bseiñ hi. Kum ka jaitbynriew shisyndon ngi la dei ban weng noh ia ki jingngeit

bieit baroh kiba la pynngeit ia ngi ba u bseiñ u long u jingthaw uba kynsha: u nongshun jong u briew. Kha-ma-kha ngi shu pyniäp ei ia u tang namar ka jingtieng bad jingisaitmet ne tang namər han ioh ia ka snieh ban die. Ia u lok ngi pynlong nongshun katba ia u nongshun ba shisha ngim tip lymne ithuh. Ban iada ia ki bseiñ ka sorkar ha ki katto katne ki jylla ka buh pyrkhing da ka aiñ ba ym bit satia ban pyniäp thala ia ki lymne pynlong mar khañ ia ka snieh jongki.

Don katto katne pat kiba ngeit ba u bseiñ u long u jingthaw uba buh ingytyrkhong bad uba pynhiar kput. Ki riewstad kila wad bniah bad pynlong bun ki test ban wad ia kane ka jingong la ka long kaba shisha ne ern. Ha ka jingwad la sabut ba kane ka jingngeit kam long satia kaba shisha. Ha ri India kiba iap puh bseiñ shisnem shisnem ki kot sha ka 20,000 ngut katba kiba iap aksiden kali pat ki long palat 500 ngut shisngi. Ka jingiäp na ka puh bseiñ barabor ka mih na ka jingleh bymsuitñiew ne jingkheñ sting ha ka iaid ka ieng ne ka trei ka ktah. Ka long kaba suk ban lait na ka puh bseiñ tang lada ngi long kiba phikir ha ka iaid ka ieng. Khamtam ki briew na nongkyndong nalor ba kim phong juti ki iaid ngen ruh haba dum. Wat haba ki rung hapoh ki khlaw ki btap kim da phikir bha ia ka leit ka wan. Teng teng ki kum iuh ne kum snoh ba ki bseiñ ki sa ioh ban puh ruma. Haba ngi rung hapoh khlaw ngim dei ban klet ban phong juti bad bat u kynja dieng duh ha ka kti: namar ka jingsawa kaba ka juti bad u diengduh ki pynmih kan pynher iap ia baroh ki bseiñ kiba dem ha lynti

ne ha pyrshah jong phi. Wat klet ba ki bseiñ kim dei satia ki nongshun u briew hynrei ki paralok bad ki nongpyniaid ryntih ia ki aĩ ki kanun ka Mariang.

Don ruh kiba pynngeit da kaba shu tharai hana ba ki mrad bapar kum ka tyrpud, ki ñiangbshiah, ki kyrbei, ki reiñ, ki ñiangmlang, ki ñiangmlir bad kiwei ki long kiba don bih bad kiba pynmynsaw ia u briew, kiba dei shisyndon ban pyniap ia ki. Hynrei ka jingwad bniah jong ki riewstad ka iathuh iangi ba kine ki mrad ki don ka bynta kaba khraw ha kaba teh lakam bad pynryntih ia ki aĩ ka Mariang. Katno ngut na ngi kiba ju iohi kumno ka ñiangiĩng ka kynrup bad bam ia ki skaiñ bad ki thapbalieh haba ki dem ha kynroh ? Lada ki ñiangmlir ki ñiangmlang, ki tyrpud ki ñiangbshiah bad ki kyrbei kim bam ia ki dkhiew bad ki ksaiñ ki khñiang bad ki kruĩ kan don ka jingroi sha ba palat u pud kiba u briew un shem jingeh ban ialeh ia ki. Phi tip kumno ka tyrpud ka leh haba ka bam dkhiew ? Ka sei la u thylliej ha madan ba ki dkhiew kin wan boi wan rap bad haba ki la snoh bun ka ring pat ia u bad bam shngiam ia ki dkhiew baroh. Dei namar kane ka daw ba u mien khasi u sin 'thylliej tyrpud' ia ki briew kiba jrong thylliej ban myntoi ia lade. Kawei ka jingshisha kaba ngim dei ban klet ka long ba baroh ki jingthaw ba im bakhiih ki don la ka jong ka jong ka bynta ha kaba buh beĩt buh ryntih ia ki aĩ ka Mariang, khnang ba ki jingthaw baroh kiba don ha sla mariang kin san kin plung bad kin suk kin saiñ.



LYNNONG -16

Katno da dor u Dieng Sohphan tymmen?

Ki riewstad kiba la pynlut por bad bor ban wad bniah ia ka jingim jong ki jingthaw baim bakhih ha sla pyrthei ki sakhi bad pynshisha ba baroh kine ki jingthaw ki long ki lok u brieve ha ki bynta bapher bapher jong ka jingim: kiba khlem ma ki baroh ki aiñ ha ka Mariang kin ãaid dkoh ãaid kynriang. Ha kane ka lynnong pat ngin wad ia ka dor ba shisha jong uwei u dieng Sohphan tymmen khnang ba ngi lah ban sngewthuh ia ka dor ba shisha jong ki dieng ki siej kiba don sawdong jongngi. Khnang ban ãoh ia ka jingtip kaba janai ka don ka jingia pynshong dor hapdeng uwei u saiantis bad arngut ki nongrep bad ia kata ngan wanrah hangne:—

Bah Ship: Phi kum u riewstad saian Bah Roy, phi lah ban ai ha ngi ia ka dor ba shisha jong shitynrai u dieng Sohphan tymmen?

Bah Roy: Ban jubab ia kane ka jingkylli lehse kan pynlyngngoh ia kiba bun ban tip ba ka dor jong shitynrai u dieng Sohphan tymmen kan long ym duna ia ka 30 lakh tyngka.

Kong Bon: 30 lakh tyngka ! Ngam lah ngeit. La u beit u jilih bad u heh katno katno ruh un nym shongdor palat ia ka 5000 tyngka: kata ruh hadien ba phi la ot ne shtah bad

pynlong dieng sawdong ne lyntang. Ha ki bri jong ngi ha nongkyndong ki shu pyut ei bad bam kruiñ ne pynlong dieng pajwa haba don surok. Lada u shongdor shisha tang shipawa na katei baroh ki nongkyndong kin deng ksiar shiryñieng.

Bah Roy: Dei hangne keiñ phi ba ki riewstad kum ma ngi ki paw ha ki khmat ki nongkyndong kum ki riewlamwir ne riewramia namar ba ngi tip bad iohi ia kaei kaba ki kim tip ne iohi. Ka jingkheñ jingdiah jongngi ka iaid shabar ka sat jong ka jingshemphang jong ki. Ha bun ki khep ngi shah kyniw bad niewbeiñ niewbieit ha ki namar ka shemphang bad ka kheñ ka diah jong ki ka kut tang ha u jylli ka pyrkhath jong ki. Ha ka jingshisha wat katei ka dor kaba nga ai ka dang duna shibun.

Kong Bon: Sa kumta lei lei te Bah Roy la lamwir ka pyrthei.

Bah Roy: Baroh ngi peit sha u dieng Sohphan tang kum u dieng ym dei ! Ngim don bor ban jngi shabar une u jylli pyrkhath. Hato Kong Bon phi tip ne em ba ki dieng ki siej ki dei ki tor jong ka Mariang: Ki nongpynmih lyer oxygen, ka lyer khuid kaba baroh ngi donkam. Nalor kane u dieng Sohphan tymmen u iada ia ka jingtuid bad jingrong noh jong ka dewlor da ki bor jong ka sngi, u lyer bad u slap. Ki thied jong u ki pynskhem ia ka khyndew, ki pynbiang jynhaw um ia ka Mariang bad ki kynshew um ha ka ramew. Nalor ki soh bad ka sboh kaba ki sla jong u ki ai, u ai ruh ka jingtngen ia ka

khyndew bad ka jaka shong jaka sah ia ki khñiang ki ksiah kiba bat ia ka jingñaid ryntih ha ka Mariang. Nalor ki kynja ñiut kiba snoh ha u bad ki kynja syntiew dieng kiba sdien ha ka met jong u; u long ruh u nongbsa jong ki sim ki mrad ki mreng bad u nong ai jaka shong jaka sah ia ki sim ki mrad. Phi tip kong katno dei ban pynlut lada dei ban shna da u briew ia kine kiei kiei baroh?

Kong Bon: Kata te kaba phylla phi Bah Roy.

Bah Roy: Nalor ba u ai jingbam ia u briew bad u mrad, ki sim bad ki khñiang ki ksiah kaba lah ban shong dor da ki lakh tyngka ha ka 100 snem; u don ruh ia ka bor ban pynsngem, pyntngen, pynbiang jynhaw um bad kynshew um ha ramew. Lada yn kheñ ruh ia ka dor jong ka bor ñada ia ka jingtwa bad jingrong noh ia ka dewlor da kiwei pat ki bor ka Mariang, tang ka dor jong kane kam duna ia ka 11 lakh tyngka. Shuh shuh u dieng Sohphan Tymmen u don ka bor ban ai jaka rieh ia ki sim ki doh, ki khñiang ki ksiah bad ki mrad ki mreng bad lada kheñ ia ka dor jong ka ym duna ia ka 5 lakh tyngka ha ka 100 snem. Kaba kham kongsan ba ngin tip ka long ba u Dieng Sohphan tymmen u pynmih ia ka lyer khuid oxygen bad kijit ia ka lyer jakhlia Carbon dioxide na ka Mariang bad lada kheñ ia ka dor jong kane ha ka 100 snem kan ym duna ia ka 10 lakh tyngka; kata ruh khlem da kheñ lang ia ka sboh ba ki sla jong u ki pynmih ne ia ka dor jong ka metbah bad ki tnad jong u kiba lah ban pynmih ki rishot bad ki lyntang ba bha eh.

Bah Ship: Kane ka jingkheĩn jong phi te Bah Roy kan pynlamwir ia baroh bad nga sngewthuh ba pleng ngi kum ki riew madan ngim kot bor ban sngewthuh ia ka dor ba shisha.

Bah Roy: Ia kata Bah Ship nga tip skhem namar ha bun ki teng nga shah kynteit ha ki nongkyndong namar ki ngeit ba ngi ki banang bastad ngi shu kren tang lait jynhaw. Hynrei kaba nga don ban phalang jingmut ha phi ka long kumno ban bsap bad pynrung ia ka mynsiem ñiewkor ia ki dieng ki siej. Ha kajuh ka por nga ñamyr;ur ruh bad phi ba ka dor dieng ka ñapher katkum ki jaka bad ia kata ruh la kheifi tang ia ka dor jong u metbah uba lah ban long lyntang ne diengsawdong. Ia kane kawei ka jingshisha ym dei ban klet ba ki dieng harud surok ki ai jingtngen ia ki nongleit nongwan katba ki dieng ha ki hat ki ñew ki kjit ia ka ñyer jakhlia bad nguid ia ka jingsawa katba ki dieng harud wah bad ha ki sharing lum pat ki bat ia ka khyndew ba kan nym tuid ne twa da kaba khanglad ruh ia ka um ban rong noh ia ka dewlor kaba don ka bor sei bor pynmih kaba long ka atiar ba donkam eh jong u brierw.

Lehse lyngba katei ka jingĩakren bad jingĩaphylliew jingmut ngi ñoh ka jubab kaba biang ia ka dor ba shisha jong uwei u dieng Sohphan tymmen. Mynta ngi sngewthuh ruh ba ki dieng ki siej pleng ki dei ki tor jong ka Mariang kiba pynmih ia ka ñyer khuid oxygen bad kiba kjit ia ka ñyer jakhlia Carbon dioxide, ki nongnguid jingsawa, ki nongpynlang sboh, ki nongbat nongteh jong ka dewlor bad ki nongpynryntih ia ka

jingshit jingkhriat ha ka Mariang. Ka pyrthei ka lynga ka pisa kumno yn taleh pyrshah ia ka lyer jakhlia (air pollution) bad ka jingsawa (noise pollution) kiba byrngem ia ka jingim jong ki jingpynlong baroh ha ka Mariang: ki riewstad ki lap ba ka don tang kawei ka jubab bad kata ka long ban sumar bad pynroi, ia ki dieng ki siej.

LYNNONG- 17

Kaei Ka pollution?

Ka dikshonari ka batai ba ka kyntien 'pollution' ha ka phareng ka mut. ka jingpynjaboh, ka jingpynjakhlia, ka jingpynkhleh, ka jingpynmilai, ka jingpynklm bad kumba ter ter. Ka jingmut kaba thikna jong kane ka kyntien ka long ba ia kaei kaei kaba khuid, kaba bha, kaba itynnad la pynjaboh jabaiñ haduh ba ka la poi sha u pud ban pynmynsaw ia ka jingim jong ki jingpynlong baroh kiba don ha ka mariang. Ki don bun jait ki jingpynjakhlia ha ka mariang kiba long ka jingmynsaw ia ka jingim jong ki jingpynlong baroh kum ka jingpynjaboh ia ka lyer (air pollution), ka jingpynjakhlia ia ki um'ki wah (water pollution) bau ka jingbym ai lad ia ka jingjai-

jai ban don ha ka mariang da ki jingsawa (noise pollution) bad ka jingpynklm ia ka khyndew da ki met ba long bih bad long nongwei ha ka.

Phi ju mutdur kumno ka sla pyrthei ka paw ha ki khmat jong u nongher haw-haw katba u nang ngam jylliew ha ki thwei jong ka ? Ki astronauts ki iathuh ba ka pyrthei mariang haba ki peit na ki jingjylliew ka haw-haw ka paw kum ka bol kaba sawbthuh kaba jngi ia lade ha ki lynter bad pyngkiang jong ki lyoh ba phyrnai bad ba itynnad. Katno ki iapbieit ban peit ia ka na jngai ! Hynrei phi ju mutdur pat kumno kitei ki juh ki nongher haw haw kin iohi lada ki hiar shajan ka nongbah Bombay ne Calcutta ? Kin iohi ia ki 40.000 tylli ki karkhana ba pynmih tdem iiong miet la bad snngi na ki atoskhana jong ki, kiba dap da ki pui pui met bih suda kiba lah ban pyniap op ia ki shisyndon.

Katba ngi nang pule ia ka geography la iathuh ia ngi ba ia ka pyrthei la tawiar da ka haw haw ba ngi khot atmosphere bad tang hapoh une u jylli ba ka lyer oxygen bad ki jynhaw um ba ai jingim ki don. Ha kine ki jynhaw um la khleh lang bun jait kiwei pat ki kynja lyer bha ba ngi tip kum ka Nitrogen, Ka Argon, ka Carbon Dioxide, Ka Hydrogen, Ka Neon, Ka Belium ezone bad kiwei bad ia kane ka jinglong kaba don ha ka Mariang la pyndap pynbiang bad pynskhem da ki snem bad ki rta khnang ba ki kynja ba im bakhih baroh kiba don ha ka kin sei, kin san bad kin plung ha ka jinglong kawei. Hynrei u bynriew da ka jingshem buit stad jong u, u la

pyrshang bad pynlang ia kiwei pat ki hajar jait met bih kiba ym tang ki pynjakhlia bad pynjaboh ia ka pyrthei hynrei kiba wanrah ruh ia ka jingmysaw bad jingtriem ia ki kynja baim bakhih baroh ha ka Mariang.

Lada ka long shisha kumta la dei ia ngi ban ioh ia ka jingsngewthuh ba janai shaphang ka 'air pollution' ne ka jingpynjakhlia ia ka lyer kaba byrngem katne ia ka jingim jong ki jingpynlong baroh ha ka Mariang. Hadien ka jingwad bniah ba sani hapoh kine ki arphew san snem da ki riewstad, la sabut ba u briew lyngba ka saian bad technology u pynlang bun bah ki lyer jakhlia ba long bih ha ka Mariang: kiba wanrah ia ki khyllah jait jingpang ia u bynriew bad ia ki jingpynlong baroh kiba don ha ka : kiba ka medical saian hi kam kotbor ban shemphang. Katba kine ki lyer bih ki nang lang ha ka pyrthei ka mariang ka lyer oxygen pat ka nang duna duna ha ka met u briew ba kane ka pateng bynriew kaba mynta ka sa ioh ki jingpang tor ba har rukom kum ka jyrhoh sahiaw, ka jingpang khmat, ka jingpang ryndang, ka jingpang khmut bad kiwei: namar ba ki ring bad pynhiar mynsiem ia kine ki lyer bih kiba ka jingstad saian bad technology ka pynmih.

Haba ngi phai pat shaphang u slap: u briew bad ka pyrthei ka mariang ki ap bad khmih lynti ba un hap ban pyntngen bad pynjai-jai. Katba mynta pat une u jingkyrkhu u kylla long pynban u nongpynjot bad nongpynjnjar sat jong ka Mariang bad ki jingpynlong baroh kiba don ha ka. Ha ka jaka ba un long u nongpyntngen bad u nongai jingim, uba pynkhuid ia ki

jakhlia bad nongkyrshan ia ki jingpynlong ba im bakhiih: u bet pynban da ka bih bad ka jingiap ha ki jingthaw kiba don ha sla mariang. Haba kumta, hangno keiñ ka lawei jong ki jingthaw baim bakhiih ka sdien ! Khlem artatien ki ieng ha tmier jong ka jingsyier bad jingartatien: ba u bynriew u kylla long nongshun jong ki jingpynlong baroh da ka jingstad bad jingshem buit shem lynti stad jong u. Mynwei ka umslap ka long kaba khuid ba suba ban bam ban dih katba mynta kala kylla bih. Hyndai u slap u pynkoit pynkhiah krat ia ki brier bad ki jingthaw baroh katba mynta pat u pynlyndum ia ki khlieh, u pynsynlen ia ki lum bad u thang ia ki jingthung ki jingtep. Kane ka long namar ba ki hajar phewhajar ton ki tdem bih kiba mih na ki kor ki bor bad ki karkhana ki kynton erbih erjakhlia ha ka pyrthei (atmosphere). Haba ki symboh slap ki ia shut bad takhuh bad kine ki phngit bin bin sulphur dioxide ka umslap ka kylla sulphuric acid: kaba don ka bor ban thang bad bam duh ia ki jingthung jingtep ha ka dur jong ka khlam ka tram. U Slap sulphuric acid u khlaif bor haduh ba u lah ban bam ia ki iing lape dewbilat bad pynsarang ia ka nar: khamtam eh ia ki sainar electric, sainar telephone bad nar rail.

Hato kane ka jingshem ki riwstad kam pyntriem ia ngi na khlieh ha kjat bad iohi da la ki khmat ba ngi ieng ha tmier jong ka riat bah jingim ? Ki riwstad ki lap ba tang naduh ka snem 1970 haduh mynta ki karkhana ha ka pyrthei ki pynmih tdem jakhlia Carbon dioxide ha ka mariang haduh kumba

1200 klur ton shisnem shisnem. Mynta ki ong ba ka Mariang ryngkat bad ki jingpynlong baroh ki don ha ka jingma namar ba ka don ka jingor pait ha ka Ozone layer kaba iada ia ka pyrthei na ka jingtyndrah jong ki bor kjat sngi ultra-violet kiba long ka jingmynsaw ia ka pyrthei bad ki jingpynlong baroh bad ki riewstad jong ka pyrthei ki ia lum ki ialang kumno ban iada na kane lym kumta kaba kut jong ki jingpynlong baroh ha ka Mariang kan wan. Une u met bneng uba dap da ka jingim bad jingkmn un long thylli lynda u briew u kyndit bynrrew ha ka por kaba biang.

Ha ka report kyllum jong ka pyrthei la iathuh ba u briew u nangiaid shaphrang ha ka saian bad technology ryngkat ki jingtip buit thymmai kiba khlem don jingkut. Lada u bynrrew u nang pynroi ia ki kharkhana bad nang pynbit ia lade ha ka jingioh jingkot bad jingsuk, ha kaba kut ka 2000 snem ka erbih erjakhlia carbon dioxide kan lang saw-shah ha ka pyrthei ka mariang (atmosphere) ban ia kaba long mynta. Hato phi ju mutdur aïu pat ka ban mih nangne ? Ki jaka kiba khriat jong ka pyrthei kin kham syaid bad ki jaka kiba shit pat kin khluit tar. Lada kata ka por ka jia ka jingma ba khraw ka ap kmang ia une u met bneng. Ki riewstad ki iathuh ba lada ka jingshit jingkhriat ka kiew tang 5 degree tam na kaba ka pyrthei ka ioi mynta, ka ior bad u thah kiba phong pangsnigiat ha ki kliar lum Makashang bad jong ki Alps kin tuid bad um hin bad kin wanrah ka jingshleï um kaba ka history jong u bynrrew kam pat ju bna bad ia ki nongbah baroh kiba don ha ki rud

wah rud duriaw yn nguid tylli ia ki. Hynrei shuwa ba kaba kum kane ka apot sepsngi kan jia ia ka pyrthei la khmih lynti ba ki bor jong ka pyrthei kin sngewthuh bad kyndit bynriew. Hynrei lada u bynriew uba bat ia kine ki bor um patiw bad u ïai im bym suitniew; ka jingjot bad jingïap kan lap kyndit ia kane ka pateng bynriew hapdeng jong kine ki khyndiat snem ki ban wan. Lada kumta, hato kam long ka jingstad ba u bynriew un khan un sawar da kino ki lad un khanglad ia kane ka jingjot bakhraw ka ban lap shen ia u ? Shisyndon ki bor synshar jong ka pyrthei ki dei ban ia tylli bad ia mir jingmut kawei ban nym ailad shuh ba ki erbih erjakhlia kin nang ïai kynton ha ka pyrthei ka mariang (atmosphere). Ia ki karkhana dei ban pynduna bad ia ka tdem erbih erjakhlia baroh kiba mih na ki dei ban khang lad syndon ban tuid ha ka atmosphere khlem jingsumar bad jingteh lakam. Ki briew ki la dei ban thung kham bun ki dieng ki siej bad sumar kham pyrkhing ia ka jingpynduh ia ki khlaw ki btap. Hynrei lada u bynriew u kuman bad um patiw ha la ka jingsarong bad ka jingkhwan lalot ka nangroi ka nangjyllei ha u, khlem artatien ka jingjot kan lap bad bam duh ia ki jingpynlong baroh ha ka Mariang. Shisyndon ki bor sorkar jong ka pyrthei kin iamir jingmut kawei ban nym ailad shuh ban shna ne pynmih ia ki tiar pynmih erbih kiba long nongwei ha ka Mariang. Kumjuh ruh ia ki dawai dashin kiba long met nongwei kum ka DDT shisyndon dei ban pynduh bad wad buit da kiwei pat ki kynja met kiba don ha ka Mariang kiba lah ban ïaleh pyrshah ia ki kaiñ pyrjong.

Ka jingkylli kaba mih nangne ka long - haduh katno ki dieng ki siej ki lah ban iada ia ka Mariang na ka pollution? Ki dieng ki siej ym tang ba ki lah ban iada na ka air pollution namar ba ki kjit ia ka Carbon Dioxide ban pynmih ia ka Oxygen; ki lah ruh ban iada ia ka jingtuid jong ka sulphur dioxide bad ka nitrogen ha ka Mariang. Ki riewstad ki iathuh ba ki dieng ki siej bad ki khlaw ki btap ki lah ban pynduna haduh 60 na ka 100 jong ka lyer jakhlia kaba don ha ka haw haw. Uwei u dieng bah u lah ban nguid ne kjit haduh ar ton shiteng ka lyer carbon dioxide ha ka shikynta katba u lah pat ban pynmih lyer khuid oxygen haduh arton ha ka shikynta. Ngi im ha ki ia jong ki kali ki motor kiba pynsuk pynaram ia ngi. Hato phi ju tip ba kawei ka kali ha ka shi second ka pynmih ka tдем petrol kaba iaryngkat shi hajar tylli ki sikret ! Aiu kan jia ia ka pyrthei ka mariang lada katne spah hajar mlian ki kali ki iai pynmih ia kane ka lyer jakhlia ! Hato u briew un don da kawei pat ka lad ban niah ia ki motor ki kali ? Namar kata ki dieng ki long ki lok ba kysai tam jong u briew kiba lah ruh ban nguid ia ka jingsawa (noise pollution) bad ban pyllait ia ki briew na ka jingpang jong ka. Phi ju iohi ba kito ki briew kiba wan na ki nongbah ki shait kren jam eh? Phi tip ka daw balei ? Namar ba ki wan na ki jaka ba jur ka jingsawa bad kane ka kylla long kum ka jingpang ha ki ba kim nang shuh ban kren mian mian. Wat la ki don tang arngut ne iaingut ka jingsawa pat kaba ki pynmih ka la long kum ka hat ka iew.

Nalor kitei ar ki pollution ne jingpynjakhlia ha ka Mariang

ka don ruh sa ka water pollution da kaba pyntuid ia ki jaboh jabaiñ na ki karkhana bad da kaba tep ia ki met bih ha ka khyndew ne bret ha duriaw. Kine ruh ki long ka jingmysaw kaba khraw ia ki kynja baim bakhih. Khamtam lei lei ha kane ka juk bun ki wah kiba ngim lah shuh ban dih um bad baroh ki jingthaw kiba im ha ki wat lada kim iap duh, ki long kiba pang ba swai kiba pynmysaw ia ka jingim u briew lada u bam ia ki. Katne ka Mariang ryngkat ki jingpynlong baroh kiba don ha ka ki mad ia kane ka apot tang namar ba ka jingkhwan jinglalot kyrthep ka tyllep ia ka iingim u briew.

Ka jubab halor kitei baroh ka long lada u bynriew shityllup ka pyrthei u kylla kaba mut na kaba pynjot ia ki khlaw ki btap bad pynlang ia ki jakhla jakhlait ha ka Mariang bad ka jubab kaba kongsan tam ban pyllait na ka jingma kaba ap ka long tang da kaba ngi thung kham bun shuh shuh ki dieng bad sumar pyrkhing ia ki khlaw ki btap. Ngim dei ban klet ba ki dieng ki siej ki ai ia ngi san tylli ki jingkyrkhu kiba ym don mano mano ba lah ban ai bad kita ki long :-

1. Ki ai ia ngi ki soh ki pai bad ka bam ka dih.
2. Ki ai ia ngi ki dieng thang ban shet ban tiaw bad ki lyntang ki thaboh ba ngin thaw iing thawsem.
3. Ki ai ia ngi ki ksai ban thaiñ ban thir bad ki jaiñ ki nep ba ngin kup ba ngin phong.
4. Ki ai ia ngi ki jingbam ia ki mrad ki mreng bad ki jingdup jingri, ki khñiang ki ksiah bad ki sim ki doh.

5. Ki long ki nongġada bad nongbat nongsumar ia ka khyndew na ka jingsshoh bad jingkit jong kiwei pat ki bor jong ka Mariang. Ki long ruh ki nongpynbiang jynhaw um, ki nongpynkhuid lyer, ki nongpyndap lyer khuid, ki nongriguid jingsawa, ki nongpynryntih ia ka jingshit jingkhriat bad ki nongtan jong ka sulphuric acid bad carbon dioxide kiba lah ban shoh bad pynjakhlia ia ka Mariang.

LYNNONG-18

Ki Thlongum bad ki Wahduit

Shuwa ba ngin ia tai ia kane ka phang kaba long ka metbah jong ka ri bad ka jaitbynriew, to ngin ia shahshkor khyndiat iaka jingia phylliew jingmut hapteng arngut ki tymmen kiba ia kiew leit bam lyer ha kliar u Lum Shyllong:—

Da kaba pynkhrai dohiap ki poi tiap ha klir.

Kong Bon: (Haba l peit sawdong u Lum Shyllong) Ade, sngew laitksuid ! Ngam pat ju mad kum kata ka lyer ba shngiam. Wow! ka jingitynnad jong ki pahar lum bad ki lawbniap. Ade ! ka Sor Shyllong kum ka pliang ksiar ha pneh ka Mariang, ki pyndap shoiñ.ia ki khulpi ka dohnud jongnga.

Bah Ship: (Da kaba kdew ia ka Wah Umġam) Peit Kong Bon, ka thie ka wah Umġam kumno ka khun khongwaiñ

itynnad sat lyngba ki padun bad ki lawbniap. Don ri kum ka ri jongngi ha snieh pyrthei !

Kong Bon : Hyndai ki ong hana ba u Lum Shyllong u dei u Lum ba shong ki Blei ! Nangne em ka mih ka khana U Sier Lapalang ! Ka Umiew bad ka Umngot ! U long em ka thymmei jong ki umpohliew bad ki wahduit bym ju rngad !

Bah Ship: Mynwei phi Kong Bon, I Mei I ju iathuh khana ba kawei pa kawei ka dong jong ka Sor Shyllong ka don la ki pung, ki pukri bad ki um shyngiar. Pahuh pahai ki ioh ka umbam umdih, um sait um khlieng ! Hynrei mynta pat shano baroh ki la rngai !

Kong Bon: (Pynbud) Lei lei naduh ba la ioh ka um sorkar; umkor, ka kylla long ka shnong ryngkhiang; kaba shitom sat tang ban ioh ka umbam umdih ruh. Phi ju iohi em kumno ki pynieng laiñ ia ki tin ha ki kor ?

Bah Ship: Ym dei Kong Bon tang ka Sor Shyllong, ka ri jong ka umpohliew bad ki Wahduit bym ju rngad: Ka ri Khasi hi baroh kawei, ka ri ba la kyrkhu. Phi iohi em ba wat kito ki pung ki pukri bad ki um shyngiar kiba ngi ju ia sum ia sleh dang khynnah kim don shuh !

Kong Bon: Ka dei ban don ka daw Bah Ship lym kumta ki pung ki pukri bad umshyngiar kim ju rngat hi. Shisyndon la dei ban wad ia ka daw bad khyllie biang ia kito ki Wahduit bad ki Umpohliew.

Lehse kane ka jingīaphylliew jingmut jong kine ki tymmen ka plie wang ia ki khyrdop ka pyrkhath jong ngi ban sngewthuh khambha ia ka phang kaba ngin ia kren. Ym don ba lah ban len ba ki tlongum ki dei ki budlum jong ka jaitbynriew bad ka thymmei jingim jong ka ri baroh kawei. Khlem ka um ka jingim kan kynriah noh na ki lyngkha ki risai ki jong ngi. Baroh kiei kiei kiba don sawdong jong ngi kin swai kin tyrkhong bad ka khyndew kan lyngki bad duh noh ia ka bor sei bor pynmih jong ka baroh. Ngi long kiba donbok ba nador ba ngi don kyrhai ki um ki wah ngi ioh kyrhai ruh u slap uba bsa um bad pyntngen ia ki jingthung jingtep. Ka jingkylli kaba don ha khmat jong ngi mynta ka long kumno ngin ri ia kine ki um ki wah ba kin nym rngat nym ryngkhiang haba ki lum ki wah kiba tap da ki khlaw kiba rben bad itynnad la pynlyngkhuid ? Mano shuh keiñ ban tan ban kynshew ia ka um haba ki dieng ki siej kim don shuh ? Katba nang wan ki sngi ki umpohliew bad ki wahduit ki la nang snai ki la nang rngad bad ki pung ki pukri ki la nang jah rngai na ki shnong ki thaw jong ngi. Hooïd, wat ki wah ki la sdang ban sti bad ki bir ki la lylla ryngkew ! Mano ban wad ban k' yllie ia ka daw jong kine baroh ?

Ki riewstad jong ka mariang ki iathuh ba ka dawbah jong ka jingrngad bad jingtyrkhong jong ki um ki wah ka long namar ka jingleh torti jong u bynriew ia ki khlaw ki btap. Ban ioh ka um kaba iai kyrsoi bad bym ju rngad dei ban don ka khlaw kaba kynshew um bad bsa ia ka. Lada ia ki khlaw ki btap bad ki dieng ki siej la pynkhyllern lut khlem artatien ka

khyndew kan tyrkhong namar ia ka um slap kaba hap ym don shuh ki nongtan ki nongkynshew. Haba ka khyndew ka la tyrkhong, kiwei pat ki bor jong ka Mariang kum u slap, ka lyer bad ka sngi kin shoh bad kit lut ia ka dewlor baroh. Haba ka dewlor kaba long ka nongsei nongpynmih kam don shuh, ki dieng ki siej kin truiñ bad lkuiñ namar ka khyndew ka la kylla ksang kylla iap. Ban ioh ki tyllong um bym ju rngad, namar kata, dei ban ri ia ki khlaw kiba don sawdong jong ki tlong um. Ki riewstad ki ju ong, 'Bha ba sumar ban ia ka ban pynkoit' bad namar kata, ban iada ia ki tlong um donkam ban sumar ia ki khlaw ki btap baroh kiba don sawdong ki tlongum. Lada don pat ki tlong um kiba ia ki khlaw ki btap la pynkhyllern lut, shisyndon dei ban thung dieng: ban khang lad ba kin nym rngad ne swai.

Ka ri jongngi ka long ka ri jong ki khlaw ki btap, ka ri jong u slap ka lyer; la katta ruh ka don ka jingkynduh um kaba jur ha ki por rang por rkhiang. Suki bad irat ki umpohliew bad ki wahduit ki sdang ban ran ban mgad namar ka jingleh torti ia ki khlaw ki btap bad ka jinglushia palat ia ki lum ki wah. Ka jingsnai jingswai jong ki um ki wah ka long ka jingmaham ia kane ka pateng ba ngi im ba lada ngim patiw bad suidñiew aiu ba ka Mariang ka kren; shisien ka sngi ngin lap ba ka um kan long ka mar kaba kyrduh eh ha ka ri jong ngi. Ki lyngkha ki risai kin kylla shrah kin kylla lyngki: Ka ri jong ka dud bad ka ngap kan kylla long ka ri kaba tyrkhong bad lyngki. Hangta ngin babe lehnohei ynda ngi iohi ba ki

lyngkha ki baden kim pynmih khaw pynmih kba shuh bad ba ki brisoh brikwai kiba long ka jingim bad jingkmien la kjap da ka khlam da ka tram.

Hynrei lada ngi angnud bad khmih lynti ba ka rep ka riang bad ka trei ka ktah kan nang roi parum pareh bad ba ka lawei kan ïai kmen bad phuhmat, ka khot ia baroh ban kyndit bynriew na ka jingbuaid jyndeï jong ka lalot khlem pyrkhat. Haba ki khlaw ki btap kim don shuh, kiba long ki nongteh nongsumar jong ka dewlor, shisnem shisnem da ka jingsaid jong u slap yn kit noh kumba shi million ton. Man ba ngi ïohi ba ka umsaw ka lyngkien sak ha ki wahbah bad ki wah rit bad ba ki tuid arsut sha ri thor, ki riwpyrkhat ki sngewthuh ba ka ri jongngi ka duh ia ka sboh ka sbur bad ka dewlor shisnem shisnem kan nym duna da ki hajar million klur tyngka. Hynrei kaba kham sngewsih shuh shuh ka long ba wat lada ngi don eh ka spah ban thied ngin nym lah shuh ban ïoh ia ka dewlor ba la duh. Ai ba ngin sngewthuh ba ka jingpyn-khyllem pathar jong ngi ia ki khlaw ki btap ym tang ba ki pung, ki pukri bad ki wahduit kin swai kin rngad, ngin duh junom ia ka dewlor kaba long ka jingai sbun ba kortam jong ka Mariang ha u bynriew.

Da la ki khmat ngi ïohi bad da la ki shkor ngi ïohsngew kumno ki kshaid ki byrthen bad kumno ki wah ki byrngem ha ka por lyiur bad kumno pat ki en ki kynjah jar jar ha ka por Tlang. Ka daw jong kane ka long namar ba ngi la duh bun ki khlaw naduh kata ka por saifnar ha Synrang Jyrteh,

Mawsynram, Myllem, Nongkrem, Nartiang bad kumta ter ter. Ha kine ki snem pat ngi la duh khambun ki khlaw ha ka jinglalot bad khwan spah. Ka Social Forestry, ha ka jingpyrshang barit, ka la sdang ban thung dieng bad pynjyrngem biang hynrei lynda u paitbah ka ri u shim ia ka jingkit khlieh ha lade; kan jin da la long kaba eh ba ka ri jong ngi kan iohi pat ia kito ki khlaw ki btap kiba la jah noh. Lada baroh ngi angnud ba ka lawei jong ka ri bad ka jaitbynriew kan phuh kan phieng; ka kamram ba kyntang jong kane ka pateng ka long ba nador ba ngi iada ia kine ki khlaw ki btap kiba dang sah, ngin pyndeng pynkup ia ka ri baroh kawei da ki khlaw ba jngum. Ka Mariang ka khroh ia ngi da ka sur ba jem bad ba myllung ban iarak bad sngewiem ia ka: namar, da kaba ngi iarak bad sngewlem ia ka, ngi sngewlem bad iarak ia lade hi bad ia ka pateng ka ban dang wan.



U SAIPYNWAI

Ka mariang, ka kmie jong ki jingpynlong baroh ha ka pyrthei mariang; ka ud ka iam ka khuslai: ba u briew u la pynkit shiryinjaiñ ki jingmong ha ka. Ka tlot, ka sngewsih: Ka wad jingiarap bad jingsngewlem na u. Ka sngewthuh shai kdar ba ka jingkhwan bad jinglalot kin nangroi ha u bynriew katba ma u pat um sngewthuh ba, katba kane ka jingkhwan bad jinglalot ka nangroi; katta ka jinglynsher jong u ia ka Mariang ka nang jur. Mynta ka khot kyrkieh la un shahshkor bad sngewsynei ne em ia ka jingiam jingud ba jar jar jong ka shuwa ba ka por kan dier noh. Ka Mariang ka don kane ban pasiaw ha ki tyndong shkor ka jingpyrkhat jong u, "Khun, nga la mong bad nga la tlot bad nga don ha tmier ka jingiap, mano ban khyllie bad ban sopsaiñ ia kine ki jingmong ba nga bah ! Phi dang kwah ne em khun ba ngan long ka kmie kaba peit ba sumar, ba bsa ba aibuiñ ia phi bad ia ki jingpynlong baroh ha sla mariang ? Balei phi mynthi phi kuman bad phi leh bym suidñiew ia ka jingiam jingud jong nga ? Hato phim sngewthuh mo khun bad phim kwah mo ban shahshkor ia kaei kaba nga pasiaw jar jar ha phi ? Phi iohi ne em khun ba sa tang 50 ne 60 snem duh phin jngi ha ki umksang ka jingbym kyrmen ?" Mynta ka Mariang ka dang khroh ka dang ud pynban ka dohnud khwan dohnud lalot jong u kam patiaw satia: i kumba ki shkor ki set kyllut, ki khmat ki kup syrdeng bad ka jabieng ka bthi. Shen shen ka por kan

iathuh ba ka jingsarong jong u ha ka saian bad technology kin dung kura ia u hi haba um poi pyrkhath. Ki iing paki dulan kiba u ju sngewmeng sngewsarong, ki karkhana kiba u shamah ba ki long ka bor jong u kin belerong bad kyrtoth lyndet. Ki jingshem hut thymmai ha ka saian bad literature kin phyrnop ia u hi sha ki thwei jong ka jingbym kyrmen bad ki jingshem buit bakhraw kiba u ju niewkor kin long nongshun pyrshah ia u.


Wat ai ba u bynriew un sngewsarong ba ula jop ia ki haw-haw. u la ruhroit ia ki bneng, u la ngam sha ki ñiamra jong ka duriaw bad u la tip lut ia ki bhoiñ jong ka ramew; hynrei to ai ba un sngewsarong tang ia kane kawei ba mynta u la sdang iaid kum u briew ha sla mariang. Ka Mahajendaro bad ka Babylon ki pyrta na ngen ka 'tem la byrhiuñ ka history da ka jingmaham ba sngewngiew—"Phi ruh phin rngai kum ma ngi lada phi sngewsarong bad phim shahshkor aiu ka Mariang ka kren ka pasiaw haphi."

Ka por ka dang don sa tang khyndiat eh lada u bynriew u kylla kaba mut bad u shahshkor ia ka jingpasiaw ba jar jar jong ka - "Burom bad niewkor ia ki aiñ ki kanun ba nga la buh khnang ba sa shisien pat ngan koit ngan khiah krad bad kynther ia baroh ki jingmong rynjaiñ kiba phi la pynkit pynbah halor ka met jongnga; lada phi kwah shisha ia nga ban long ka kmie kaba ieit, kaba sbun bad kaba pyndap pynbiang ia ki jingdonkam jongphi baroh: da kaba kyrsan-rngiew pat ia phi sha ka jingkoit jingkhiah krad bad jingkmn

sa shihajar snem. Hynrei lada phi kheĩn dewthala ia ki kyntien kiba nga la khlei bad pasiaw haphi, khlem artatien phin sa babe dier por."

Ngi don, namar kata, ka jingkit khlieh ba kyntang ban pyndep ia la ka kamram; lada ngi kwah ban im ha ka jingsuk bad jingkmēn. Ban iohi ia ka lawei kaba phymnai nyngkong ngi dei ban ia suk bad ka mynta. Ka mynsiem khwan lalot da kaba lute bad pynjot ia ka Mariang ka dei ban leit noh. Ka Mariang ka kwah ba u bynriew un long uba jai-jai bad ba adkar: ka jingim kaba shemphang kumno ban im ha ka jingiasuk bad baroh ki jingpynlong ha ka Mariang: kiba dawa ia ka juh ka hok nongkynti ban im ban khih bad ban ia kmen lang. U bynriew tang da lade hi um lah ban long uba suk bad ba kmen ha sla mariang. Lada um kwah ban sngewthuh ia kane, un khot ha lade ia ki jingjynjar kiba khlem don jingkut jingsdang. Ka Mariang ka tyrwa sngewbha ia ka jingkmēn bad jingkyrmen ryngkat ka jingkoit jingkhiah bad jingdap biang lada u bynriew u pdiang hun mynsiem bad shah shkor da ka dohnud kaba sngewhun ia kaei kaba ka Mariang ka kren bad pasiaw jar jar ha u.

La kut



KIWEI KI KOT DA UJUH U NONGTHOH

1. Ka Jitlakhai (Poetry)
2. Na Kpep U Sohpetbneng (Poetry)
3. Ka Panjira Ksiar (Poetry)
4. Ka Mamla (Poetry)
5. Ki Siej Khongpong bad ki Sairupa (Poetry)
6. Tang ka Jingaingu Thang (Poetry)
7. Na ki Tnum Sop-Pring u 7 Trep (Poetry)
8. Ka Saiñ Pyrkhat Synshar Khadar U Khasi (Prose)
9. Primary Education in the United Khasi & Jaintia Hills.
Its Socio-Cultural Roots and Early History (History)
10. U Ba Bah ia ka Khia ka Shon (Drama)
11. Ka Jingieit ka Pynbor (Drama)
12. Ka Thud Tam (Drama)
13. Ki Khana Nongtymmen na ki Sawlyer ka Ri Khasi
Book I (Folklore)
14. Ki Khana Nongtymmen na ki Sawlyer ka Ri Khasi
Book II (Folklore)
15. Khasi Komposishon (Khasi II)